

# SAN PABLO KARTA NYAFXTE FXI'JNI KORINTO ÇXHABTEWE'SX JÏI

*Korintotewe'sx Dxus yakh fxi'zesawe'sxtxi  
Pablo fxi'jni*

<sup>1</sup> Adxa' Pablo yaaseth, Dxus peeygãhçxa pa'yate Jesukristo jxkaahnisa. Txã'wẽ yũuwa'ja's Dxusku txhitxhçxa nvxiht.

<sup>2</sup> Korinto çxhabte yakthë'jwe'sxtxi weçxana fxi'jaçthu, txã'wẽy yakthë'j Sosteneswa yuwe weçxaakaja'k. I'kwe'sxa' Kristo Jesus yakh txutemée fxi'zeya' utxaapa'ga Dxus luuçxi'kwe. Majũwe'sxwa kwe'sxtxi jxpe'jsa Jesukristo yasena kxsussa ũstxna txãawe'sx yã'jçxa ja'daçxah txajx tasxte yuuçxáa fxi'zekahnku Dxusa' pa'ya. Txãa Jesukristo' kwe'sx jxukaysatx jxpe'jsa'.

<sup>3</sup> I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristowa. Txãa pa'ga Dxus yakhçxáa mfxi'zewe.

*Jesukristo pu'çxpa'ga Dxusa' kïh yuhwa pee-  
jxmée jxukak pees*

<sup>4</sup> Dxusa's weçxana nesthu yu' i'kwe'sx pa'gate, txã'wẽ Dxusa' i'kwe'sxtxi peeygãhçxa kïh yuhwa peejxmée jxukak pees Jesukristo pu'çxpa'ga.

<sup>5</sup> Txã'wẽ Kristo yakh fxi'zeya' utxaapa'ga, Dxusa' txajx dxi'pte kïhtewa jxuka i'kwe'sx sxiigmée fxi'zewa'ja's jxukak ũs, Dxus

yuwe's pta'sxwa'j ma'k yuu, meeçxa' maa isa pta'sxsatewa jiyuwa'j ma'k yuu nawa jxuka.

<sup>6</sup> Txãa pa'ga Kristo kaapiya'jni's i'kwe'sx ũuste kaavxya'ja'i'kwe.

<sup>7</sup> Txã'wẽ Dxus pu'çxte', i'kwe'sxa' kĩhte yuhwa sxiigmée i'kwe txajx dxi'pte fxi'ze' Jesukristo kiiwa'j ena's ũythasna.

<sup>8</sup> Dxusa' txã'wẽ ewçxáa jxpe'jna nes yuuna nmeh entepkaçx, kxah Jesukristo kii ente' i'kwe'sxa' kĩhte yuhwa yuuwemeesa yuune'kwe.

<sup>9</sup> Dxusa' na'wẽ ewçxáa jxpe'jya' neeyũuk na' kxtey yuuna. Txã'wẽ ewçxáa jxpe'jya' íçxáak txajx Nçxi'k Jesukristo yakh fxi'zeya' pa'ya i'kwe'sxtxi'.

*Dxus yakh fxi'zesawe'sx puutx puiina txuteni*

<sup>10</sup> Kwe'sxtxi jxpe'jsa Jesukristo dxi'pte yakhthẽ'jwe'sxtxi yu'kxpejeçthu, puutx ewteçxah puutx we'weçxa txutemée kxazii ja'daçxah teeçxsa na'wẽçxaçxáa ew yajxna fxi'zekahn.

<sup>11</sup> Kloé yattewe'sxa' adxa's pta'sxtxi txã'wẽ i'kwe'sxa' puiina fxi'zena ũsta' jĩna, txãa pa'gath adx yakhthẽ'jwe'sxtxi txã'wẽ we'we'.

<sup>12</sup> I'kwe'sxa' teeçxsa na'wẽçxah fxiyfxiy we'wena ũsi'kwe: Maaíi yu', adxa' Pablo yakh u'jsath, naapkaçxha' vxite' Apolos yakh u'jsath. Vxite' Pedro yakh u'jsath, aça' vxiteíi yu' Kristo yakh u'jsath jĩna i'kwe we'we'.

<sup>13</sup> Nawa Kristo' çteeçx ahtewe'sx yakhçxáa fxi'zewa'jsaga yuuá'? çI'kwe'sx pa'gate Pabloga kluuste uuá'? Meeçxawa ç'i'kwe'sxa' Pablo yase's kxsusçxakwe yu'te bautisãyni yuuá'?

14 Ewçxáa ne'tka i'kwe'sxtxi maa yuhtxwa yu'te bautisãymée, naasáa Krispo vxite' Gayo txãawe'sxçáatxthu bautisãy.

15 Txãa pa'ga kim yuhwa txã'wě Pablo yase's kxsusçxa bautisãynith jïya' ãjameetxna.

16 Vxite' Estefxanaswe'sxçáatxthu bautisãy, meeçxa' vxitetx bautisãy wá'ntka nawa txãa yuutxi' yaakiçmeeth.

17 Kristo' adxa's bautisãyya' kaahme', naasáa kwe'sx ewte neeyũuwa'ja's pta'sxya'çxáak kaah. Nawa naa kiwetewe'sxa's jiyunisa yakhméek pta'sxkaah. Txã'wěme', Kristo kluuste uuni's pta'sxnisa' e'skhě neeyũuwe'sxte.

*Nwe'weya' ãjawa'ja's Dxus pheu'jçxa nvxiit-nisa*

18 Kristo' kwe'sx pa'gate kluuste uuk jïna pta'sxni' kïhwa seelpimeesa na'wě ne' pthũuse' vxituçxa nxus kiwete u'jwa'jsatxi'. Nawa Dxus yakh ũsya' u'jwa'jsa kwe'sx yuutxi' txã'wě pta'sxni' seena' wala seelpisa', kwe'sxtxi ewte nvxiitwa'jsa' naa pa'ga.

19 Dxus libroute we'weçxa':

Ivxiitu'nja naa kiwetewe'sxçxá's jiyuni's, Sa' naa kiwetewe'sxçxá's jiyuni's kïhte yuhwa selpiiwa'jmée nvxiitu'nja jï'k.

20 Txã'wě' aç'a' naa kiwetewe'sxçxá's jiyuni' ¿kïhte selpiikx? Kïhtewa jxuka jiisa kaapiya'jsatha'w sũhsa' ¿mtee yuutxki? Naa kiwete kïh ũsna txã'sna jxuka jiisathě'j ¿kïh yuukx? Æçha' txã' ¿kïhteçxá' selpiima'k? Naa kiwetewe'sxçxá's jiyunisa's kïhtewa seelpimeek vxit Dxusa'.

21 Dxusa' jiyuk naa kiwetewe'sxçxá's jxuka jiyusa' Dxusa's jiyuya' ãjawa'jmeesatewa. Txãasak kîhtewa jüimeeçxawa txã'sna üusuh jxuka yajkxçxa txajx pta'sxni's wa'lmée jxpa'gateçxáa nwe'wewa'ja's vxit, makwe txajx pta'sxni' vxite yakh yu' seelpimée na'wētewa.

22 Judiuwe'sxa' cielujū seena'sa kaavxya'ja'jni'stxi uy wēje', naapkaçxha' griegowe'sxa' naa kiwete jiyunisa'stxi pakwé'.

23 Nawa kwe'sxa' Kristo's kluuskhē ki'pçxa ikhniçxá'stha'w pta'sxi'. Judiuwe'sxa' txã'wē pta'sxni'stxi jxpuba', naapkaçxha' griegowe'sx yuutxi'sa' kîhtewa seelpimée luuku we'weni na'wē ne' pthūuse'.

24 Nawa Dxus txhitxhnisa judiu vxite' griego txãawe'sx yakh yu', Kristo yuuçxáa nwe'wewa'jsa', nwe'wewa'ja's Dxus pheu'jçxa nvxiitnisa.

25 Naa kiwete nasa jiisa üstxna txãawe'sx yakh yu', Dxus jiimeesa na'wēsaçxawa, txãawe'sxte jxthaakwe jiisa' Dxusa'. Aça' Dxus çxhãçxhameeçxa ãjasamée na'wēsaçxawa, nasa naa kiwetewe'sxte jxthaakwe çxhãçxhasa'.

26 Yakthē'jwe'sx, i'kwe'sxtxi Dxus txhitxhni's mjiyuwe. I'kwe'sxa' naa kiwetewe'sxa's yu' walamée jii i'kwe sa' çxhãçxhasawa kuhmée i'kwe, sa' jxtuhthesawa kuhmée i'kwe.

27 Txã'wēçxawa i'kwe'sxa' Dxus txhitxhnisa i'kwe, i'kwe'sxtxi jiimeesata' jīna naa kiwetewe'sx nasa we'we'tx txãawe'sxtxi kaythame'jwa'jsa. Sa' txã'wēy naa kiwete nasa we'weçxa': Çxhãçxhamée ãhmeesata' jī'tx txãawe'sxtxiwa kaythame'jwa'jsa.

28 Naa kiwete nasa we'weçxa': Kĩhtewa seelpimeesata' jĩnatx açewe'we' txãa açewe'wesatx seelpimeekhẽ nvxiitwa'jsa i'kwe.

29 Txã'wẽ i'kwe'sxa' ãhmeeekwesatx txhitxh-nisa i'kwe na' kim yuhwa Dxus dxi'pte iwejçx yajxna fxi'zeya' ãjameene'kwe.

30 Kristo Jesus yakh fxi'zewa'ja's Dxusku vxit. Aça' Kristo's jiyuwa'ja'swa Dxus iicxáak vxit. Sa' txãa Kristopa'ga yuuçxáa kwe'sxa' Dxus dxi'pte ewtetha'w neeyũu, txajx tasxu txutemée fxi'zeya'.

31 Txãa pa'ga Dxus yuuçxá's weçxana tuuthe'jwa'ja's Dxus librute na'wẽ fxi'jni ũsa': Maawa jiith sũhna jxtuhthe yaakxwẽje'ççxa', Dxus yuuçxá's weçxana tuuthe'jwa'ja' jĩ'k.

## 2

### *Kristo kluuskhẽ uuk txajx kaapiya'jni's pta'sxni*

1 Yakthhẽ'jwe'sx, adxa' Dxus yuwe's kaa-jiyu'jya' kxtee pa'jçxa', jiisa we'weni seena' zhiçxkwesa yakh pta'sxna pa'jmeeth.

2 Kxtee i'kwe'sx yakh ũsçxa', naa kiwetewe'sxa's jiyunisa yakh pta'sxna ũsu'çmeeth, naasáa Jesukristo's kluuskhẽ ki'pçxa ikhniçxá'sthu pta'sxna ũsu'.

3 I'kwe'sx tasxte pa'jçxa', wala jiisa na'wẽ pa'jmée, wejxwa jiimeesa na'wẽ ũukhna pa'jçxath Dxus yuwe's i'kwe'stxxi pta'sx.

4 Nawa naa kiwetewe'sxa's jiyunisa yakh we'weçxa i'kwe'stxxi' knaymeeth. Txã'wẽ yũumée, wejxwa Dxus pu'çxte txajx Espiritu yakhçxáath kaajiyu'jçxa i'kwe'stxxi' knay.

5 I'kwe'sxa' naa kiwetewe'sxa'sçxáa piyaçxa Dxusa's jiyumée, wejxwa Dxus úçxáa pu'çxte Dxusa's jiyusa yuukahnthu naa kiwete jiyunisa yu'sa' we'wemée.

*Dxus pheu'jnitxi' txajx Espiritu yakh úçxáak ya'jiyu'*

6 Txã'wěçxawa, Dxusna ew yã'j jiisa yakh yu' txã'wě we'weni' seena' yuh jiisa we'wenisata'. Nawa txã'wě we'weni' naa kiwetewe'sxmeeta', sa' naa kiwete ne'jwe'sx skhěwwa'jsa ũsta' wala jiisa txãawe'sx we'weniwa meeta',

7 wejxwa naa kiwe meetey bagaçxte yuhwa pçumée kwe'sx ewte neeyūuwa'ja's Dxusa' pheu'jçxa ji'phyã'kh yu' kim yuhwa jiyunimeesa txã'snatha'w pta'sxi'.

8 Txã'sa' naa kiwete ne'jwe'sx kim yuhwa jiyumeeta'. Jiyuwaça', kluuskhě ki'pçxa ikhwa'jmée ne'ta yu' kwe'sxtxi jxpe'jsa cielujūwe'sxa's.

9 Nawa Dxus libroute fxi'jni ũsyã'kh yu' txã'wě jiyuwa'ja'smée, txãa pa'ga ne'ta jiyumée. Txajjik na'jĩ':

Dxusna yaakxsawe'sx jĩi Dxusa' pheu'kh txãa pheu'jni's

Kim yuhwa iuymeeta', sa' iiwěse'jwa meeta',

Sa' ũusteçxáa yuhwa yaakxni ji'phu'çmeeta' jĩna fxi'jni'.

10 Dxusa' txajx Espiritu yakhku txã'wěsatx kwe'sxtxi kaajiyu'j, txãa pa'gatey txajx Espiritu' Dxus pheu'jni kim yuhwa jiyuwa'jmeesa ũstxna txãatx jxuka jiisa'.

<sup>11</sup> Ayga nasaa pwe'sxçxáa yuhwa ¿kim jiyuya' ãjakx vxitee ũus yaakxni's? Naasáa txã'wẽ yaakxsayçxáa ¿jiyumeema'k? Txã'wẽy Dxus Espiritu yuuçxáa jiia' Dxus yajkxçxa pheu'jnisatxi'.

<sup>12</sup> Kwe'sxa' naa kiwetewe'sxa's jiyunisa's jxpa'gaçxa ũsmeetha'w. Dxus Espiritu txajx tasxu yuusa'stha'w jxpa'ga, Dxus peeygãhçxa kwe'sxtxi ew yũuk txãatx jxuka jiyuya'.

<sup>13</sup> Txãasatha'w kwe'sxtxi Dxus ew yũuni's txajx Espiritu kaajiyu'the pta'sxya' aja', sa' naa kiwetewe'sxa's piyani's pta'sxi'çmeetha'w. Dxus jĩitxi' Dxus Espiritu yakhíiçxáatha'w pta'sxi'.

<sup>14</sup> Nawa Dxus Espiritu's ũuste ji'phmeesa' Dxus Espiritu we'weni's jiyuya' ajameetxna. Txã'wẽsa yakha' jiimeekwesa we'weni na'wẽçxáa pthũusena. Dxus we'wenitxi' Dxus Espiritu yakhçxáa ya'jiyuna, txãa pa'ga Dxus Espiritu yakhmée yu' jiyuya' ajameetxna. Dxus yaakxnitxi' Dxus Espiritu yakhçxáa jiyuya' ajatxna.

<sup>15</sup> Nawa maawa Dxus Espiritu's ũuste ji'phsa' jxpubamée ew jiyuya' ajatxna, aça' txã'wẽ yũusa's jxpubana ũsa' jiya' ajameetxna maa yuhwa.

<sup>16</sup> Txã'wẽ jiyuya' ajawa'jmeete íiçxáak Dxus librute na'wẽ we'we': ¿Kim jiyuya' ajakx Dxus yaakxni's? Dxusa's ¿kim kaapiya'jya' ajakx? jĩ'k. Txã'wẽtewa, kwe'sxa' jiitha'w Kristo yaakxni's, Dxus Espiritu kaajiyu'pha'ga.

### 3

*E'zsa Dxus tasxte mjĩisaçxáatha'w*

1 Yakhthê'jwe'sx, makwe wala jiisa ne'kwe nawa Dxusa's ew jiisa yakh na'wê yu' we'weya' ãjameeth, Dxusa's kîh yuhwa jiimeesa yakh na'wêçxáath we'weya' ãja. Kristo kaapiya'jni yu's kîh yuhwa jiimée luuçx le'çxkwe na'wêçxáa i'kwe.

2 Luuçx le'çxkwesa's ma'wêta leçxiçxáana puuçu' vxite ũ' yu's puuçmée txã'wêy i'kwe'sxtxi' kaapiya'jçxawa thêymeekuêsaçxáanath kaapiya'jçxa nvxiht, txã'wê thêysa yu'sa' ãjameei'kwe naa pa'ga sa' ãçxpkaçx jiyuya' ãja'çmeei'kwe.

3 Txãasa ãçxpkaçx i'kwe'sx ũuste Dxusa's yu' kîh yuhwa ji'phmeei'kwe, txãasa i'kwe pu-utx yahçena puiina txuteeçxa fxi'ze'. Txã'wê yūunisa', Dxusa's ũuste ji'phmeesa fxi'zenisa'.

4 Txã'wê Adxa' Pablo yakh u'jsath jīçpkaçxha' vxite' Apolos yakh u'jsath jīna txã'wê yūuçxa', Dxusa's çma'wêçxáa yuhwa ũuste ji'phmeesa na'wê yuh meekwe wakx?

5 Ūus miiyajkxwe: Pablo' çkîh yūusaana? Aça' Apoloswa çkîh yūusaana? Kwe'sxa' naasáa Dxusna selpisaçxáatha'w, Dxus ma'wê jxkaathe' txã'wêy mjīitha'w teeçxa na'wêçxah, txãa pa'ga i'kwe Kristo's jiyuwa'ja's ji'phu.

6 Adxa' nyafxte uuhsaçxáath yu', naapkaçxha' Apolosa' yu'awsak yu'. Nawa Dxusku kbuuçxa'jçxa nuywala.

7 Txã'wê uuhsa vxite' yu'awsa txã'wê yūusa' kîhwa jxtuhthesameeta', naasáa Dxus yuuçxáa jxtuhthesa', txã'wê kbuuçxa'jçxa nuywalapa'ga.

8 Uuhsa vxite' yu'awsa txãawe'sxa' maa yuhwa jxthaakwesamée, txãa na'wêçxaçxáata'. Nawa



dewewa'j yu'sa' txakweçxaçxáa yu'mée Dxusa' deweena, makwe mjĩite', txã'sçxáan deweena.

9 Dxus mjĩinite kwe'sxa' kxtee mjĩisaçxáatha'w, aça' i'kwe'sxa' Dxus mjĩini kiwe na'wěsa i'kwe.

Txã'wěy i'kwe'sxa' yat na'wěsa i'kwe, aça' txãa yata's txahna pheu'jsa' Dxusa'.

10 Dxus jxkaathe adxa' yat txajxa' jiisa na'wě yat txaahwa'ja's kaaçxida'jsaçxáath. Aça' adx takhni kajkwete' vxite mjĩina ũsa' yata's. Nawa ma'wě mjĩiwa'ja'swa jxpa'yakx mjĩiwa'j ji'pha' teeçxsa na'wěçxah.

11 Yat txaahwa'ja's takhna kaaçxida'jni ũsyã'ja' txã' Jesukristo', aça' kim yuhwa vxite fxiy kaaçxida'jwa'j ji'phmeeta'.

12 Na'wě kaaçxida'jni kajkwete kĩh yakhwa mjĩitxna: vxyuu beh, vxyuu çxihme, kwet zhiçxkwesa yakh meeçxawa fxtũu, çhĩçh, khĩh txã'wěsa yakh.

13 Nawa Dxus kastigãywa'j ente ya'pdxi'puçxa ya'jiyuna ma'wě mjĩini'swa. Txãa ente' ipx yakh kĩijana, aça' txãa ipxa' kaajiyu'juna mjĩisa ma'wě mjĩini'swa.

14 Txãa kaaçxida'jni kajkwete mjĩisa' ew wáa mjĩina ipxte çxhavxywa'jmeesa yakh aça' txã'wě ew mjĩipa'ga dewení yuuna.

15 Nawa txãa yatte mjĩisa' ipxte çxhavxywa'jsa yakh wáa mjĩina aça' jxuka çxhavxyte', mjĩipa'ga dewenimée yuuna. Naasáa kxtee mjĩisa yuuçxáa ewte neeyũuna, txãa ipx walajũ ũphna kasehsa na'wě.

16 I'kwe'sxíi Dxus ũswa'j yati'kwe, naa pa'ga

Dxus Espiritu i'kwe'sx ũuste u'pwa'jsate ji-imeewá'kwe.

<sup>17</sup> Dxus ũswa'j yata' kīh pkal yuhwa ji'phmeesa na's maawa Dxus ũswa'j yata's ivxiitute', Dxusa' ivxiituna txã'wē yūusa's. Txãa Dxus ũswa'j yata' i'kwe'sxi'kwe.

<sup>18</sup> I'kwe'sxa' maa yuhwa jxpubanuwe, wala ji-isatha'w sūhna. Maawa naa kiwetewe'sxa's wala jiisa ũsçxa', jiimeekwesa na'wēçxáa miijajkxwe. Txã'wē yuuçxáa, wala jiisa yuuna pa'jane'kwe.

<sup>19</sup> Naa kiwetewe'sxçxáana wala jiyuni', Dxus dxi'pte' kīh yuhwa seelpimeesa'. Txajíik Dxus librute na'wē we'we': Wala yã'j jiitha'w sūhna fxi'zesatxi' ewmeete khēewa'ja'sku vxitu' Dxusa', txã'wē yaakxpa'ga.

<sup>20</sup> Txã'wēy vxite ajkhēwa na'wē fxi'jni ũsa': Wala jiitha'w sūhna fxi'zeni', kīhte yuhwa seelpimeetewa jiia' Dxusa' jī'k.

<sup>21</sup> Txãa pa'ga nasaçxáatx jxthaakwe iivejçx iivejçx yajkxna fxi'zewa'jme'. Txã'wē yaakxkah-meníi kīhwa jxuka i'kwe'sx jīçxaçxáata'.

<sup>22</sup> Pablo ma'k yuu, Apolos ma'k yuu, Pedro ma'k yuu, naa kiwe ma'k yuu, itxi fxi'zenisa ma'k yuu, uuwa'j ma'k yuu, naa ensu fxi'zeni ma'k yuu, vxite ensu fxi'zewa'j ma'k yuu, nawa txã' jxuka i'kwe'sx jīçxaçxáata'.

<sup>23</sup> Naapkaçxha' i'kwe'sx yu' Kristo jīi i'kwe, aça' Kristo yu' Dxus jī'.

## 4

### *Jesukristo jxkaahnisawe'sx mjīini*

<sup>1</sup> Txã'wēyã'the', kwe'sxtxi' naa sūhnaçxáa mfxi'zewe: Kwe'sx ewte neeyūuwa'ja's Dxusa'

txãniitey pheu'jçxa ji'phu'k kim yuhwa jiyunimeesa txã'sna pta'sxkahn neewe'weçxa nvxihtte Kristo tasxte selpisaatxna sũhnaçxáa mfxi'zewe.

<sup>2</sup> Txã'wẽ mjïiwa'ja's jxpa'gasa' ma'wẽ mjïiwa'ja'swa jxuka kxtey yuuwa'j ji'pha'.

<sup>3</sup> Adx mjïini's i'kwe'sxa' ma'wẽwa nuywe'wene'kwe. Nawa i'kwe'sx we'wenitxi' adxa' le'çxkweçxáa yuhwa yaakxwa'j ji'phmeeth. Adxíçxáa yuhwa adx mjïini' ewa' sũju'çmeeth.

<sup>4</sup> Nawa adx ũuste yu' ewme' sũhna yu'çme'. Aça' adxa' ew mjïisath jïçxa txã'wẽ we'weçmeeth. Jesukristo yuuçxáa adx ma'wẽ mjïisatewa we'wewa'j ji'pha'.

<sup>5</sup> Txãa pa'ga mjïini's we'wewa'j en ãhmeyna yu', i'kwe'sxa' nuywe'wenuwe. Mũyhaswe Jesukristo kïhpkaçx. Txãa yuuçxáa ew ma'k yuu ewmée ma'k yuu nawa kaajiyu'juna makwe jiyunimeesa ũusteçxáa yaakxnisa sũthni yuu ma'k nawa jxuka. Txã'wẽ yũunijũ ya'jiyuna nasaa iisa ma'wẽ yũusaaçxawa.

<sup>6</sup> Yakthẽ'jwe'sx, txã'wẽ nuywe'wena fxi'zeni'sthu yu'kxpeje', Apolos fxi'zeni vxite' adx fxi'zeni txãatx thegçxa txã'wẽy fxi'zekahn. Txã'wẽ yuuçxáa, i'kwe'sxa' jxpubamée fxi'zene'kwe Dxus yuwe ma'wẽ jxkaathe' txã'sçxáa kxtey yuuna. Sa' kim yuhwa txã'wẽ teeçxsaçxá's weeçx yajkxna wedxçxa', vxite yu's ahçena fxi'zemeene'kwe.

<sup>7</sup> Idxa's çkinga jxthaakwe walasa vxit? Txã'wẽ Dxus peesnimeesa çkïhçxá' ji'phga'? Txã'wẽ kïhwa jxuka Dxus peesniçxá's ji'phçxa', çma'wẽçxaga iïwejçx yaaki', idxçxáa pakweçxa

uysáa na'wě?

8 I'kwe'sxa' kīhwa peejxmée ji'phsa na'wě yā'ji'kwe yaaki'. Kwe'sx yuutxi' e'skhē nvxihtçxa, jxkaahsa na'wě i'kwe yaaki'. Wejxwa jxkaahsaíi yuuwaça' ewna, kxah i'kwe'sx jxkaah-nite kwe'sxwa ih ũsya' āja'nja'w sūju'th.

9 Kwe'sxa' Jesus jxkaahnisatha'w nawa Dxusa' nmejkhē ne' nvxiht sūju'th, naasáa ikhwa'j nvxi-itnisa na'wěçxáatha'w. Kwe'sx pxthaa yuuçxa uuçte', angeleswe'sx vxite' nasawa thegkahn nasa walaa ksxavxyte nvxiitni na'wě ũstha'w.

10 Kristo kaapiya'jni's pta'sxpa'gaçxáa kwe'sxtxi' kīhtewa jiiimeesa luuku we'wesata' jī'tx, naapkaçxha' i'kwe'sx yu' Kristo kaapiya'jni's sxiigmée jxuka jiisa na'wě i'kwe yaaki'. Kwe'sxa' āhmeekwesatha'w, naapkaçxha' i'kwe'sx yu' jxtuhthesa i'kwe. Kwe'sxtxi' açe'tx nasa', nawa i'kwe'sx yuutxi' peeygāja'tx.

11 Åçxpkaçx pxthaa yuunatha'w fxi'ze', nasa ewmée nuywe'weni, wēena, yū'wēena, athwa'j ropa ji'phmée, yatwa ji'phmeetha'w,

12 sa' kuseju mjīina wahtxnatha'w fxi'ze'. Nasa' kwe'sxtxi wēesxutewa, ewçxáatha'w pasu'. Kwe'sxtxi pkxuuna pāpaçtewa, wantāyçxa iideewe'çmeetha'w.

13 Kwe'sxtxi açewe'weçtewa, ka'tu' peeygāhnatha'w yu'kxpeje'. Naa kiwete kxtā' seelpimeesa na'wētha'w fxi'ze', kazxa's wāataani na'wētha'w yahçena fxi'ze' åçxpkaçx.

14 I'kwe'sx thaamekahn txā'wě fxi'jaçmeeth, wejxwa adx luuçx wedxnisa na'wě

yu'kxpehnaçxáath fxi'ja'.

<sup>15</sup> Kristo jxkaahni's kaapiya'jsa diez mil ma'kwe ji'ph yuu, nawa ney na'wësa yu' kuhmëe ji'phi'kwe. Txã'wë Kristo Jesus yakh fxi'zewa'ja's kaapiya'pha'ga i'kwe'sx ney na'wësa' adxthu.

<sup>16</sup> Txã'wëth i'kwe'sxtxi neewe'we', adx na'wëy fxi'zekahn.

<sup>17</sup> Txãasa kajaçthu Timoteo adx nçxi'k wedxni na'wësa Kristo yakh txutemëe fxi'zesa's. Txã' i'kwe'sxtxi kaayaki'jina adx ma'wë ne'tka Kristo yakh fxi'ze txã'sna. Sa' txã'wëy mteeçxah Dxusa's jiisa pkhaakhena üstxna kxsü pekühçxa', ma'wë ne'tka kaapiya'ja' txã'snaïçxáa kaayaki'jina.

<sup>18</sup> I'kwe'sx maaü yu' wala çxhãçxha iiwejçx ya-jkxna üsi'kwe, Pablo' bagaçx yuhwa pa'jmeena jïna.

<sup>19</sup> Nawa Dxus ma'wë jxthãaste', dud yuwe'nja puutx uyya', txã'wë iiwejçx we'wena üssa kîh ma'tx yuu aan çxhãçxha we'wena üsçxa', txã'wëy Dxus yakhwa çxhãçxha fxi'zena üstxna.

<sup>20</sup> Dxus yakh fxi'zenisa' yuwejuçxáa iiwejçx we'wena fxi'zenimeesa', wejxwa Dxus ma'wë jxkaathe', kxtey yuuna fxi'zewa'ja'.

<sup>21</sup> I'kwe'sxtxi adx thegya' pa'jçxa' ¿ma'wëkwe yuu jxthãasu'? ¿Peçxuukwe jxthãasukwe', meeçxa' peeygãhnakwe pa'j jxthãasu'á'?

## 5

*Peekx njï'j npaasa yakh üçxáa nyu na'wë fxi'zesa*

1 Teeçx i'kwe'sx yakh pkhaakhesa' peekx njĩj npaasa yakhĩçxáa nyu na'wẽ fxi'zena ũsa' jĩnik ya'jiyu'. Txã'wẽ fxi'zeni' pkal iiméh wala kazxsa'. Dxusa's jiimeesa yuhwa txã'wẽ yu' fxi'ze'çmeeta'.

2 Txã'wẽ kazx pkal yuusa's i'kwe'sx ksx-avxyu kutxi'jipkaçxte, ewsatha'w sũhna ii-weeçxwa'jçxá's i'kwe yaaki'.

3 Adxa' i'kwe'sx yakh ih yu' ũsmeeth, nawa adx ũus yaakxni yakh yu' i'kwe'sx yakh ih ũsthu. Txãasath txãa piçthẽ'j ma'wẽsatewa jiyuçxa', kastigãywa'theyã'j nvxiht, adx ũus yaakxni yakhçxáawa.

4 I'kwe'sxa' Jesukristo's neewe'weçxa txajx dxi'pte mpuutxwe'wewe pkhaakheçxa. Aça' adxwa i'kwe'sx yakh ih ũs na'wẽyçxáa pu'çxhi'nja, aça' Jesukristowa i'kwe'sx yakh ih ũsuna.

5 Txã'wẽ yũuçxa txãa piçthẽ'ja's eçxthẽ'j kusete manvxihtwe, txajx kakwe' vxitukahñ. Nawa txajx ũus yu' vxitumeena Jesukristo kĩi ente'.

6 I'kwe'sxa' txã'wẽ kazx pkal yuusa's kutxi'jmée ũsçxa', iiwejçx yajxna ũswa'j ji'phmeei'kwe. Jiimeewá'kwe na'wẽ we'weni's: Lewadura' le'çxkuẽeçxawa skuutxh ũ'wete jxuka pẽetheje'k jĩni's.

7 Lewadura ewmeesa's mkuutxi'jwe pẽethekahmen, kxah i'kwe'sxa' Paskua fxiestate ũ'nisa pan lewadura ji'phmée na'wẽ yuune'kwe. Txã'wẽ pkal ji'phmée fxi'zekahnku Kristo' kwe'sx pa'gate uu, txã' kwe'sx Paskuatewe'sx piisxakuẽk yu'.

8 Txã'wëyã'the', kwe'sx ũuste kīh yuhwa ewmeesa ji'phméé Dxusa'sçxáa ũusuh jxuka yajkxna kwe'sx Paskua fxiesta's vxitwa'j ji'ptha'w. Txã'wë ew yajkxna vxitni', pan lewadura ji'phmeesa yakh fxiesta's vxitni na'wësa'. Nawa ewméé yajkxna Paskua fxiesta's vxitwa'j ji'phmeetha'w. Txã'wë ewméé yajkxna vxitni', lewadura ewmeesa yakh fxiesta's vxitni na'wë'.

9 Nyafxíi vxite karta fxi'th txãate' na'wëth yũukaah: Kazx pkal yũuna fxi'zesa yakh pkhaakhenuwe jĩnath fxi'j.

10 Txã'wë kazx pkal yũuna fxi'zesa yakh, vxitee jĩitx kusa'j wëesa, pesweesa, dxus ĩtximeesatx neewe'wesa txãawe'sx yakha' jxukate mtxu-teewe peena yu' puutx uymée fxi'zeya' jĩçxa txã'wë we'wemeeth. Txãawe'sx yakh puutx uyya'mée txutee wëeçxa', naa kiwejũ kasehçxa yuuçxáa txã'wë peena yu' puutx uymeene'kwe.

11 Na'wëth yũukaah txã'sna ne'kwe jiyumée: Maawa yakhthē'tha'w jĩççxawa, kazx pkal yũuna, vxitee jĩitx kusa'j wëesa ma'k yuu, dxus ĩtximeesatx neewe'wesa ma'k yuu, açewe'wena wëesxuusáa ma'k yuu, tũusáa ma'k yuu, meeçxa' pesweesa ma'k yuu, txã'wë yũuna fxi'zesa's i'kwe'sx ksxavxyte jxpe'jnuwe jĩnaçxáath we'wena fxi'j. Nasa txã'wësa's i'kwe'sx yat-su pi'kxwa'jme', aç'a' ka'tuwa pi'kxmeena.

12-13 Dxusna jiimeesatxi' txãawe'sx ma'wë yũusaatewa adxa' txãatxi' paapëjxna kastigãywa'j ji'phmeeth. Dxusçxáa kastigãywa'jsa' txãawe'sx ähmée yũusaatxi'.

Nawa i'kwe'sx ksxavxyte ũssa yakhthē'jwe'sx  
 āhmée yūuni yu's i'kwe'sx paapēywa'jsai'kwe.  
 Txāasa txāa kazx pkal yūusa's i'kwe'sx ksxavxyu  
 mkuutxi'jwe.

## 6

*I'kwe'sx yuuwe yuuni's Dxusa's jiimeesa khuēs  
 tasxsu paatxhī'khni*

<sup>1</sup> I'kwe'sx pwe'sx yuwe susni's ǰkīh yūuɕxakwe  
 Dxusna jiimeesa khuēs tasxsu paatxhī'khya'  
 u'jwe', wejxwa yuwe susni's Dxusa's jiisa pwe'sx  
 i'kwe'sxɕxāa pheu'jupkaɕxte.

<sup>2</sup> I'kwe'sxa' jiimeewá'kwe Dxus  
 luuɕxyā'ja' naa kiwe yuhnawa kwe'sx  
 jxkaahwa'jsameewá'ntka'w. Txā'wē naa  
 kiwe yuhnawa i'kwe'sx jxkaahwa'jsaɕxa' ǰkīh  
 yūuɕxakwe yuwe thēymeesa yu's pheu'jya'  
 āja'ɕmée?

<sup>3</sup> I'kwe'sxa' jiimeewá'kwe kwe'sxa' ange-  
 leswe'sx yuhtxwa yu'kxpehwa'jsameewá'ntka'w.  
 Txā'wēɕxa', kwe'sx pwe'sx yuwe susni's wejx  
 ũukhmée pheu'jwa'j ji'ptha'w.

<sup>4</sup> I'kwe'sx pwe'sx kazxthē'j susna puini's  
 ǰkījxa'kwe paatxhī'khya' u'jwe' Dxusa's jiimeesa  
 tasxsu?

<sup>5</sup> Na'wēth we'we' i'kwe'sx thaamekahn:  
 ǰYakhthē'jwe'sx pwe'sx yuwe susni's  
 pheu'jwa'jsa teeɕxɕxáawa jiisameewána  
 aɕne'kwe txā'wē vxitetx pi'kxya' u'jwe'?

<sup>6</sup> Yakhthē'j pwe'sx yuwe susni's Dxusna ji-  
 imeesa khuēs tasxsu paatxhī'khte' ǰewmanx?

<sup>7</sup> Txā'wē i'kwe'sx pwe'sxíɕxāa puutx pui-  
 ina fxi'zeni' kazx thaampa'sa', aɕa' ǰmjīitekwe



i'kwe'sxtxi pesweena ma'wēwa pthāaweçtewa Dxusa's jiimeesa tasxsu yu' paatxhī'khya' u'jmée sxuuna' neeyū'çmée?

<sup>8</sup> Txā'wē yūumée i'kwe'sxtxi pesweete', i'kwe'sxwa yakhthē'j jītxíçxáa pesweena kīhwa ewmée i'kwe yū'.

<sup>9-10</sup> Jiimeewá'kwe Dxus jxkaahna ūsnite u'kaya' ājawa'jsameeta' txā'wē ewmée yūusa' jīni's. Jxpubanuwe, txā'wē yūusa' Dxus jxkaahna ūsnite u'kaya' ājawa'jsameeta': Pkal kazxsate fxi'zesa, dxus itximeesa's neewe'wesa, ptamçxawa vxite yakh fxi'zesa, piçthē'j pwe'sxíçxáa pkal yuuna fxi'zesa, pesweesa, vxitee jītx kusa'j wēesa, tūusáa, wēesxuusáa, īsxiiçxa vxitee jī's iiyamusa txāawe'sxa' Dxus jxkaahnite u'kaya' ājameetxna.

<sup>11</sup> I'kwe'sxa' nyafxíi yu' txā'wēsa i'kwe yu'. Nawa āçxha' Dxus peltunāyte', jxuka yaateni i'kwe, sa' Jesukristo vxite' kwe'sx Dxus Espiritu pu'çxte', Dxus yakh yuuçxáa fxi'zesai'kwe.

*Peekx kakwe's pkalte kaafxi'ze'jwa'jme'*

<sup>12</sup> Kwe'sxtxi ma'wē yūuweçxtewa ma'wēwa fxi'ze'nja'w nawa kwe'sx fxi'zeni's kim yuhwa yupmeena jī'tx txā' isa yuja'. Nawa jxuka yuutxi's nwēese'jwa'j jī'phmeetha'w, maaíi yu' seelpimeesata' txāa pa'ga.

<sup>13</sup> Isatx we'we': Ū'a' tutxhtewe'sxa', naapkaçxha' tutxha' ū' jxpa'gawa'jsa', aça' txāatxi' ¿kim yupuukx? jī'tx. Isa txāa e'zsa' txā'wētewe'sx yuhta', aça' txāatxi' we'wewa'j jī'phmeetha'w, pçuwa'jsaçxáata' naa pa'ga. Nawa kakwe's ptammeesa yakh pkalte

kaafxize'jwa'jme', txãa pa'gatey kwe'sx kakwe' Kristo jĩ', naapkaçxha' Kristo' kwe'sx kakwe's jxpe'jsa' naa pa'ga.

14 Dxusa' ma'wëga Kristo's ĩtxi vxit, txã'wëy kwe'sx kakwe'swa thëymée ĩtxi vxit ya'wa', naa pa'ga pkalte fxi'zewa'jsame'.

15 I'kwe'sx kakwe' teeçxsa na'wëçxah Kristo kakwe'íçxá', aç'a txã'sa' jiimeewá'kwe. Txã'wëte', Kristo kakwe's uweçxa u'y ewmeesa yakh utxaate ¿ewmanx? Weh yuhwa txã'wë yūuwa'jme'.

16 Meeçxa' i'kwe'sxa' jiimeewá'kwe, u'y ewmeesa yakh pkal yūunijū' teeçx kakweçxáak yuuna pa'ja' jĩni's. Txã'sna we'weçxak Dxus librute na'jĩ': E'zsa teeçx kakweçxáa yuuna pa'jana jĩ'k.

17 Txãa pa'gak maawa Kristo yakh utxaate', Kristo yakh teeçx kakweçxáa yuuna pa'ja' Dxus dxi'pte.

18 Ma'wë yuhwa nyumeesa yakh kazx pkal yuuwa'jme'. Pkal ma'wësawa ũsta', nawa peekx kakwe yakh yu' meek pkal yu'. Nawa ptam-meeçxa kazx pkal yuuna fxi'zesa' txajx kakwe's íçxáak suwu', pkalte jxūna u'jçxa.

19 Jiimeewá'kwe i'kwe'sx kakwe' Dxus Espiritu u'pwa'ja', txãa pa'ga i'kwe'sx ũuste' Dxus Espiritu u'pa', aç'a kakwe' i'kwe'sx jĩi me'.

20 I'kwe'sxa' Dxus weynisai'kwe wala pa'gate. Txã'wëyã'the', kazx yūumée Dxus dxi'pte ewçxáa yūuna mfxi'zewe i'kwe'sx kakwe yakh vxite' i'kwe'sx ũus yaakxni yakhwa txã'wëy. Txã'wëme', e'zĩ Dxus jĩiçxaçxáata'.

## 7

*Ptamunisu yu'kxpehni*

<sup>1</sup> I'kwe'sx pějxna fxi'jni's āçxh pasya'wath. Piçthē'ja' nyu ji'phméé fxi'zetewa ew yuhna.

<sup>2</sup> Nawa txã'wē pkal kazx yuuwa'jçxáak wala kaseje' naa pa'ga piçthē'ja' nyu ji'phuwa'ja', aça' txã'wēy u'ywa peekx nmi' ji'phuwa'ja'.

<sup>3</sup> Nmi'a' zhiçxkwe fxi'zewa'ja' txãawe'sx nyu yakh, aça' nyua' txã'wēy ew zhiçxkwe fxi'zewa'ja' txãawe'sx nmi' yakh.

<sup>4</sup> Nyua' peekx kakwe' sūhna yaakxwa'j ji'phme', txajx kakwe' nmi' jī' naa pa'ga, naapkaçxha' nmi'wa peekx kakwe' sūhna yaakxwa'j ji'phme', txajx kakwe' nyu jī' naa pa'ga.

<sup>5</sup> Ptamsa yā'ja', ih fxi'zeni's puutx wa'lwa'jme', naasáa Dxusna orāyya'waçxa yuuçxáa, maz ençxáawa txutewa'ja'. Nawa e'su yā'ja' ki' ih fxi'zewa'ja', txã'wēme' eçxthē'j kaypuba'jwe'sxte.

<sup>6</sup> Maawa jxukaysa ptamuwa'ja's jxkaja'çmeeth, nawa ptamuçxa fxi'zenik adx yakha' ew thegu' naa pa'gaçxáath txã'jī'.

<sup>7</sup> Jxukay adx na'wēçxaçxáa fxi'zewaç, wejx ewna sūju'th. Nawa Dxusa' nasaa iisa fxiyfxiy fxi'zewa'ja's ne' pees, vxitetxi' ptamuçxa fxi'zewa'j, vxitetxi' ptamumée fxi'zewa'j.

<sup>8</sup> Vxiudawe'sx vxite' ptammeesatxthu yu'kxpeje' txãawe'sxa' ptamumée adx na'wēçxáa fxi'zewaç wejx ewna.

9 Nawa peekx kakwe jxthãasni's neeweya' ãjasame' ptamuçxa fxi'zeni wejx ewna, txãasuçxáa yajkxna fxi'zeya'mée.

10 Nawa ãçxha' ptamsatxthu jxkaaja': nyua' nmi' yakh txutewa'j ji'phme'. Na'wẽ jxkaahni' adx yajkxçxa we'wenime', Dxusku txã'wẽ jxkaaja'.

11 Nawa maa enteya' maaíi yu' txã'wẽ nmi' yakh txutewáana nawa txãa u'ya' peena yu' vxite yakh iimi'ya' ãjameena. Meeçxa' nmi' yakh ki' yuwee ewuuçxa yu' nmi' tasxtey ki' sxawedxa' ãjana. Txã'wẽy nmi'wa txajx nyu yakh txuteeya' ãjameena.

12 ãçxha' vxitetxi' adx ũus yaakxni yakhthu yu'kxpeje': Maa yakhthẽ'j nyuuwa Kristo's ũuste jxpa'gasameeçxawa, nmi' yakh wa'lmée fxi'ze wẽeyã'the', nmi'a' txutemeete ewna.

13 Txã'wẽy nyua' Kristo's jxpa'gasatewa nmi'a' Kristo's jxpa'gasameeçxawa, nyu yakh wa'lmée fxi'ze wẽeyã'the', txãa nyua' txutemeete ewna.

14 Nmi' Kristo's jxpa'gasameeçxawa, txajx nyua' Kristo's jxpa'gasa yakh wa'lmée fxi'zepa'ga, txãawe'sx ptam fxi'zeni' Dxus dxi'pte ewsa'. Aça' txã'wẽy nyu ma'k Kristo's jxpa'gasamée yuu nawa txajx nmi' Kristo's jxpa'gasa yakh wa'lmée fxi'zepa'ga txãawe'sx ptam fxi'zeni' Dxus dxi'pte ewsa'. Txã'wẽmeewaça', i'kwe'sx luuçxa' Dxus peeygãanisamée yuutxna. Nawa ewsaté íçxáa i'kwe'sx luuçxa' Dxus peeygãanisata'.

15 Nawa Kristo's jxpa'gasamée nmi' ma'k yuu meeçxa' nyu ma'k yuu nawa txutee wẽete', wa'lmeete ewna. Txã'wẽ yu' txuteeya'

ãjane'kwe, txãa pa'gatey Dxusa' puutx puiimée fxi'zewa'ja'sku jxkaaja'.

16 Txã'wē nmi' ma'k yuu meeçxa' nyu ma'k yuu nawa txã'wē peekx nmi'a's Dxus jii knayu'nja sũhna txutemée fxi'zeçxawa, jii yu' meek ya'fxi'ze' Dxusa's jiyuwa'jsamanx jiyuwa'jsameemanx nawa.

17 I'kwe'sx fxi'zewa'ja's ma'wēne' Dxus nvx-iht açã' txã'sçxáa kxtey nwēese'jna fxi'zewa'ja' nasa iisa teeçxsa na'wēçxah. Nyafxii i'kwe'sxtxi Dxus pa'yaçte ma'wēsane'kwe yu' na' txã'wēesa mfxi'zewe. Dxusna yaakxsa mteewa pkhaakhesa ũstxna txãawe'sxtxi' txã'wēth jxkaaja'.

18 Maaíi yu'sa' cirkuncidāynisa's wáa Dxus pa'yana açã' txã'wē cirkuncidāyni mneeyũu. Vxite' cirkuncidāynimeesana wáa Dxus pa'yana açã' txã'wēesa mneeyũu ya'cirkuncidāymée.

19 Ya'cirkuncidāy ma'k meeçxa' ya'cirkuncidāymée ma'k nawa txã' kĩhwa meesa'. Dxus jxthãasni's kxtey yuuna fxi'zeteçxáa kĩhwa yuumeena.

20 Nasa iisa ma'wēsaçxah ne'kwe yu' Dxus pa'yaçte', txã'wēesa mfxi'zewe.

21 Meeçxa' idxa' vxitee kusete jxkaahni fxi'zena ũste wá' Dxusa' pa'ya açã' txajũ kasehmée fxi'zewa'ja' kuh yajkxmée. Nawa txãa selpinijũ kasejxa' ewuweçxte', mkaaseh txãajũ.

22 Txã'wē Dxusa' Kristo's ũste jxpa'gaya' pa'yaçte', vxitee kusete jxkaahni fxi'zena ũssaçxawa, açxha' vxitee jxkaahnijũ kaseçxa Kristo's selpisáa i'kwe yuu Dxus dxi'pte. Txã'wēy vxitee kusete selpisamée ma'k yuu nawa açxha'

vxitee kusete selpiia' u'kasa yuuna Kristo tasxte.

<sup>23</sup> I'kwe'sxa' Dxus weynisa i'kwe pa'gate. Txãa pa'ga naa kiwete nasaa nwe'sxtxi selpisãa ãhmeeekwesatha'w sũhmée mfxi'zewe.

<sup>24</sup> Txã'wē' naa pa'ga yakthē'jwe'sx, ma'wēsaçxah ne'kwe yu' Dxus pa'yaçte', nawa txã'wēesa mfxi'zewe nasa iisa teeçxsa na'wēçxah Dxus yakh txutemée.

<sup>25</sup> Kna'sawe'sxtxi' Dxusa' txã'wēk jxkaaja' jĩwa'j yu' kĩh yuhwa ji'phmeeth. Nawa Dxus yakh ew fxi'zesa yu'kxpehni ewna sũhçxath adx ũus yaakxniju na'wē pta'sxi':

<sup>26</sup> Piçtakxa' teeçxçxãa yã'j fxi'zeççxa', txã'wēesa fxi'zete ewna sũju'th adxa', naa ensu' fxi'zewa'j wala thēya' txãa pa'ga.

<sup>27</sup> Nyu ji'phyã'jçxa', txutewa'ja's yaakxnu. Nyu ji'phmeesa', nyu yuuwa'jsa pakweya' yaakxnu.

<sup>28</sup> Nawa ptamunisa' pkalme', açã' kna'sa ma'k ptamuuya' yajkx nawa txãawa pkalme'. Nawa ptamusa' naa kiwete nxuswa'j thēysa's pejka ji'phutxna, açã' txãatxthu ji'phumeewaça' sũju' adxa'.

<sup>29</sup> Yakthē'jwe'sx, na'wē fxi'zewa'ja'sthu pta'sxi': Kuh enmeeçxãa yã'j ũsa'. Naajũyã'ja' ptamçxawa nyu ji'phmée na'wēçxãa mfxi'zewe.

<sup>30</sup> Nxuswa'j en pa'thewa, nxusmée ũssa na'wēçxãa mfxi'zewe. Naapkaçxha' fxiestate ũssa' weçxana ũssa na'wēmée mfxi'zewe. Kĩh weyni ji'phçxawa txãa weyni' kwe'sx jĩ' sũhmée mfxi'zewe.

<sup>31</sup> Naa kiwete kĩhwa wala ji'phsa' ji'phmeesa na'wēçxãa meswe. Txã'wēme', naa kiwe' pçuuya'wa'.

<sup>32</sup> I'kwe'sxa' peekx yatte thegna fxi'zewa'ja's ji'phméé fxi'zewaç wejx ewna sũju'th. Txã'wẽ maawa nyu ji'phmeesa' yatte thegwa'ja's yajxméé Dxus yakh ew fxi'zewa'jçxáanak pa'pçxuna fxi'ze'.

<sup>33</sup> Nawa nyu ji'phsa' peekx yatte thegwa'ja'sçxáak jxthaakwe pa'pçxuna fxi'ze', txajx nyu peejxmée fxi'zekahn.

<sup>34</sup> Txã'wẽy u'ywa nmi' ji'phsa vxite' nmi' ji'phmeesa' txã'wẽçxaçxáa yajxna fxi'ze'çmeeta'. Nmi' ji'phmeesa' Dxus jĩiçxá'sku jxthaakwe pa'pçxuna fxi'ze', txajx kakwe txajx ũus yaakxni yã'jçxa Dxus dxi'pte ew fxi'zeyá'. Naapkaçha' nmi' ji'phsa' naa kiwetewe'sxa'sçxáak wejx jxthaakwe pa'pçxuna fxi'ze', nmi' weçxakahn.

<sup>35</sup> Na'wẽth pta'sx nawa i'kwe'sxtxi yupna txã'jĩçmeeth, wejxwa i'kwe'sxtxi selpiwa'ja's pu'çxnaçxáath txã'jĩ', kxah Dxusa's yuuçxáa wejx thaakwe selpiina fxi'zene'kwe sũhçxath txã'jĩ'.

<sup>36</sup> Txã'wẽtewa maái yu' adx niisa's kmi'a'the wejx ewna. Txã'wẽme' e'suyã'ja' iimi'ya' ewumeena sũhna yaakxa', kmi'a'jane'kwe, i'kwe'sx ũuste ma'wẽ Dxus kaaũusuthe'jena txã'snaçxáa kxtey yuuna. Mi'çxa fxi'zeni' pkalsame'.

<sup>37</sup> Nawa vxite' txã'wẽ niisa's kmi'a'j wẽmeesa', kmi'a'jmeene'kwe txã'sa' kimwa jxkaahmeena açá' kmi'a'jmeeçxa', wejxwa ew yũuna.

<sup>38</sup> Maawa txã'wẽ kmi'a'jsa' ew íiçxáa yũuna. Nawa kmi'a'jsame' jxthaakwe ew yũuna.

<sup>39</sup> U'y iimi'sa' nmi' yakh txuteeya' ājameena nmi' nee itxiyte yu'. Txā'sa' leyku txā'wē juuna' jxkaaja'. Nawa nmi' uute yuuçxáa ki' iimi'ya' ājana maa yakhwa, nmi' yuuwa'jsa Dxusa's jiisa yakh.

<sup>40</sup> Nawa nmi' uuyā'the' peena yu' iimi'meeçxa', wejx wēt fxi'zena. Adxa' txā'wēth yaaki', aça' adxa's Dxus Espiritu ne' kaaūsuthe'je' sūju'th.

## 8

*Dxus itximeesatx weçxaya' tajkx ikhni's pta'sxni*

<sup>1</sup> Āçxha' Dxus itximeesa ũsta' txāatx weçxaawa'j tajkx ikhnisa's pta'sxya'wath. Txāa çxiçxa' kīhwa suwwa'jsameetewa txā'sa' ew jiitha'w kwe'sxa'. Nawa txā'wē jiith sūhnisa' weeçx we'wewa'jçxáak kaseje', aça' puutx ya'peeygāhna Dxus yakh çxhāçxha fxi'zewa'j yu' ya'ji'phu'çme'.

<sup>2</sup> Maawa txā'sçxáana jiiçxa jiith sūhna fxi'zesa', kīhwa jiimeeta' ew jiisa na'wē yu'.

<sup>3</sup> Nawa txā'wē yūumée, Dxusa'sçxáa ũsuh jxuka yaakxsa's Dxusa' jiia' txā'wē yūusa's.

<sup>4</sup> Txā'wē dxus itximeesatx weçxaya' tajkx ikhnisa çxiçxa's ũ'te çewmée dxihmanx? Ew ũus miijajkxwe. Txāa dxus itximeesa' naa kiwete kīh yuhwa meesata', naasáa teeçx Dxus yuuçxáa itxisa ũsa', peena vxite yu' meeta'.

<sup>5</sup> Dxus yaasesa naa kiwete vxite' cielute ũswáatxna txā'wē yaakxsa yakh yu'.

<sup>6</sup> Nawa kwe'sx yakh yu', teeçx Dxus yuuçxáa ũsa' kwe'sx Tata cielute ũssa. Txāak kīh



yuhwa peejxmée jxuka taki'jçxa nvxiht, aç'a' kwe'sxa' txãa pa'gaçxáatha'w ïtxi fxi'zeya' äja'. Txã'wëy kwe'sxtxi jxpe'jsawa teeçxçxáa üsa', txã' Jesukristo'. Kïhwa jxuka txajx thegna jxpe'pha'gaçxáa üsta', txãa pa'ga kwe'sxwa txajx jxpe'jnisa ïiçxáatha'w.

<sup>7</sup> Aç'a' txãa yakh üssa yakha' çxiçx txã'wësa's ü'tewa, kïh yuhwa suwwa'jsameetewa txã'sa' jiiimeeta' jxuka yu'. Txãasatx naa kiwete dxus ïtximeesatx nyafxii neewe'wesawe'sx Dxusa's açxamée ew jiisa' çxiçx txã'wësa's ü'te', ewmeena süju'.

<sup>8</sup> Nawa kwe'sx ü'ni' Dxus dxi'pte ewsa vx-itwa'jsame'. Aç'a' txã'wë ü'çxa' ewsawa yu-ume'nja'w, sa' ewmeesawa yuume'nja'w.

<sup>9</sup> Txã'wëtewa, mpa'yajkxwe, i'kwe'sx txã'wë kïhnawa ü'ya' äja'nja'w sühçxa txãa çxiçxa's ü'pa'gaçxáa Dxusa's açxamée ew jiiisatx pkalte kweete'jwe'sxte.

<sup>10</sup> Meeçxawa na'wë wáa yuune'ga: dxus ïtximeesatx weçxanisa çxiçx txweyni's wáa ü'ya' kaçxhiine'ga, aç'a' Dxusa's açxamée ew jiisa uyçxa', txãawa txã'wëy ü'wena.

<sup>11</sup> Aç'a' iidxpagaçxáa Dxusa's açxamée ew jiisa iidx yakthê'j üusa' vxituna, txajx pa'gate makwe Kristo uutewa.

<sup>12</sup> Aç'a' Dxusa's açxamée ew jiisa yakthê'jtx pkalte kweete'jçxa', idxwa Kristo dxi'pte yu-uwesa yuune'ga.

<sup>13</sup> Txãa pa'ga adx yakthê'j pkalte wetewe'sxte çxiçx txã'wësa's bagaçxte yuhwa ü'me'nja pkalte kweete'jya'mée.

## 9

*Jesukristo jxkaahnisa' ũ'wa'ja's jxuka pēywa'j ji'pha'*

<sup>1</sup> Adxa' Jesus jxkaahnisatewe'sxthu, naa pa'ga sã'jĩni's jxuka pēywa'j ji'pthu, txãa pa'gatey kwe'sxtxi jxpe'jsa Jesusa's iuuythu, sa' txajx tasxte mjĩith aça' adx mjĩiçxa Jesus tasxte kuutxa'jnisa i'kwe i'kwe'sxa'.

<sup>2</sup> Vxitesa adxa's we'weçxa': Pablo' Jesus jxkaahnisatewe'sxme' jĩsawa ũswáatxna. Nawa i'kwe'sx yu' txã'jĩya' ajameene'kwe. Adxa' Jesukristo jxkaahnisatewe'sxte içxáa i'kwe'sxa' Jesukristo's nwēese'jsa i'kwe adx pta'sxte.

<sup>3</sup> Adxna nuywe'wesatxi' na'wēth pasu':

<sup>4</sup> Adxa' ũ'wa'ja's jxuka pējxya' ajawa'jsath.

<sup>5</sup> Ma'wēta Jesukristo jxkaahnisawe'sxwa txãawe'sx nyuutx pe'jçxa sã'jĩni fxi'ze' vxite' Jesus nyakh, Pedrowe'sxwa, aça' adxçxáa çkĩh yũuçxa txã'wēy yũuya' ajamée yuuki'th?

<sup>6</sup> Bernabé yakh kwe'sx e'zsaçxáa wáa Dsus yuwe's pta'sxna u'juçxawa çnaa kiwete mjĩia's nvxiitwa'jsamée ne'tka'w?

<sup>7</sup> çMaa soldauçxá' sã'jĩnimée fxi'zegá'? çKimga uuthasx vxitçxa', kxtee yũnni's ũ'we'çmée? çKimga kla taki'jçxawa txãa klaa leçxi's tudxi'çmée?

<sup>8</sup> Adx ũusuhçxáa txã'wē yajkçxa we'we'çmeeth. Txã'wēmeete iik Moises leytewa txã'jĩ'.

<sup>9</sup> Kxteea' na'wē fxi'jni': Bweya's kmaaj'jiççxa', yuwe's tudwa'jme' iĩũ' mjĩikahn jĩ'k. Dxusa' txãa bweyçxáatx peeygãhçxa txã'wē we'weme',

10 wejxwa kwe'sxtxi we'weçxak txã'jĩ', txãa pa'gately txãa leya' kwe'sx jĩk yu' naa pa'ga. Txã'wẽ uuthasxsu mjĩisa ma'k yuu meeçxa' kiwe's wuwsa ma'k yuu nawa kxtee mjĩini's kutxi'jçxa ã'we'nja sũhnak mjĩ'.

11 Txã'wẽ yã'the', kwe'sxwa i'kwe'sx ksx-avxysu Dxus jĩi mjĩisatha'w aç'a' i'kwe'sxa' mi-iyajxwe ç'kwe'sx mjĩipa'ga ã'wa'j kĩhçxáawa jxpa'gawa'j ji'phmeemtha'w?

12 Vxite mjĩisawa ã'wa'ja's jxpa'gane'ta aç'a' ç'kwe'sx yu' wejx txã'wẽ jxpa'gawa'jsameemtha'w?

Txã'wẽçxawa kwe'sxa' mjĩipa'ga ã'wa'ja's iipẽjxmeetha'w, wejxwa kwe'sx peejini's wantaĩ'tha'w, Kristo kaapiya'jni's yupsá na'wẽ yu-uya'mée.

13 I'kwe'sxa' jii i'kwe dxuus yatte mjĩisa' dxuus yatte ã' yakhtxi fxi'ze'. Txãawe'sxa' na'wẽtx yu': altalte pu'çxsa' kxtee niimal ikhni çxiçxa'stxi ã'we'.

14 Kristowa txã'wẽyçxáak jxkaaja': Dxus yuwe pta'sxsa txãawe'sxa' kxtee sã'jĩni fxi'zewa'j ji'phta' jĩ'k.

15 Nawa adxa' багаçx yuhwa iipẽjxmeeth txã'wẽ sã'jĩwa'ja's, sa' i'kwe'sx kĩhçxáawa peeskahn txã'jĩna fxi'jaçmeeth. Kĩhwa sã'jĩmeetewa wẽtthu fxi'ze' na' txã'wẽ i'kwe'sxtxi thãasmey uuwa'jsath.

16 Adxa' Dxus yuwe's pta'sxpa'ga iijewçx yaakiçmeeth, txãa mjĩia' adx jĩime', Dxus jĩ' txãa pa'ga. Aç'a' Dxus yuwe's pta'sxmeeçxa', wala yuh seena' yuuwesa yu'nja.

17 Txã'wẽ dukh jxthãasçxa mjïi pakwewaça', txãa mjïipa'ga jxpa'gawa'j ji'pthu sũju'nja. Nawa txã'wẽ yajkxçxa mjïinisa yu'çme'. Txãa mjïia's Dxusku ùs, aç'a' txajx jxkaahniçxá's kxtey yu-uwa'j ji'pthu kîhwa dukh jxthãasmée.

18 Dxus yuwe's wêt weçxana pta'sxni adx yakha' dukhni na'wësa', aç'a' adx mjïipa'ga i'kwe'sx yuutxi's dukh jxthãasu'çmeeth.

19 Txã'wẽ adxa' dukh jxthãasmée ùsthu, aç'a' adxa's kim yuhwa jxkaahwa'j ji'phmeeta'. Nawa Kristo tasxte nasa kuh nuypa'jya' sũhçxa yuuçxáath selpisáa yuu jxukaysatx.

20 Bagaçxtewa judiuwe'sx yakh ùsçxa', judiu na'wëythu yu', txãawe'stxi Kristo jïi knayya'. Adxa' Moises leya's nwëese'jeçii yu' meeçxawa Moises leya's nwëese'jsa yakh ùsçxa yu', txãa leya's nwëese'jsa na'wëythu yu', txãawe'stxi Kristo jïi knayya'.

21 Sa' vxite nasa Moises leya's jiimeesa yakh ùsçxa', adxwa txãawe'sx na'wëyçxáath jiimeesa na'wẽ yuuna fxi'ze' makwe Dxus leya's yu' nvxihtmée ùsçxawa, txãa pa'gatey Kristo jxkaahni'sthi nwëese'jna fxi'ze'. Nawa txãawe'stxi Kristo jïi knayya'çxáath txã'wẽ yũ'.

22 Dxusa's açxamée ew jiisa yakh ùsçxa', adxwa txã'wëy jiimeekwesa na'wëth fxi'ze'. Nasa ma'wëkwesate', adxwa txãawe'sx na'wëyçxáath fxi'ze', txã'wẽ yũute' maaçxáawa ewte neeyüwa'ja's uyuwáatxna sũhçxa.

23 Txãasath kîhtewa jxuka txã'wẽ yũuna fxi'ze', Dxus yuwe ewsa's vxitetxwa jxtxuhdeya'.

24 I'kwe'sxa' peekx jii i'kwe wuwuuçxa knay wëesa' kxazii ja'daçxahtx wuwu', peeswa'j ùsna

txã'sna knayya'. Nawa teeçxsa yuuçxáak knayu'. Txãa knaysawa ma'wěga çxhãçxha wuwu', i'kwe'sxwa txã'wěy myũuwe, peeswa'j ũsna txã'sna jxpa'gaya'.

<sup>25</sup> Maawa wuwuuçxa knay wěesa' txãawe'sx kakwe's kaapiya'jna pheu'ju'tx yaçkhěy. Txãawe'sxa' naa kiwete korona pçuwa'jsa's jxpa'gaya'çxáatx txã'wě yũ'. Nawa kwe'sxa' bagaçxte yuhwa pçuwa'jsame's jxpa'gaya'tha'w txã'wě pa'pçxu'.

<sup>26</sup> Adx txã'wě yũuççxa', ma'wě wuwu-uwa'thewa jiiinée yu' wuwuume'nja. Adxa' puiiya' jiiimesa na'wě fxiisuçxáa ujkame'nja.

<sup>27</sup> Txã'wě yũuya'mée, adx kakwe's kaapiya'ja'th. Txã'wěme', vxiteçxáatx ew kaapiya'jçxa', kaapiya'jsa adx yu' seelpimeesa yuuya'mée.

## 10

*Dxus      ãtximeesatx      neewe'wekahmen  
yu'kxpehni*

<sup>1</sup> Yakhthě'jwe'sx miiyajkxwe: nyafxiitey kwe'sx yaçgawe'sxa' jxukay Dxus nwe'wena jxpe'jni tãaph aphnitx fxi'zena ũsu', sa' jxukay ãkhwala bejuywa ew uykhěwtxi.

<sup>2</sup> Jxukay Moises yakh txutemée fxi'zeçxa yuuçxáatx jxukay tãaph dxiite Dxus nwe'weni yuu, sa' txã'wěy ãkhuywa uykhěwtxi,

<sup>3</sup> sa' jxukaysatx Dxus sã'jĩni fxi'zena ũsu'.

<sup>4</sup> Txã'wěytxi jxukaysa Dxus yusni yu'a'swa tudxna fxi'zena ũsu', sa' Dxusa' txãawe'sx yakh ih dxi'the pi'kxna u'jweççxa', penxate yu' kutxi'jçxa yusku. Aça' txãa penxa yu' Kristok yu'.

5 Txã'wě Dxusa' ew yũutewa, nasa wejx kuhsa yu' Dxus dxi'pte ew fxi'zemeeta', txãa pa'ga Dxus kastigãyte uutz nasa u'pnimée kiwesu.

6 Txã'wě kastigãyni uutz nawa txãa yu' kwe'sx jxpa'yajkxçxa txãawe'sx na'wěy ewmée yũukahmençxáak txã'wě yũu.

7 Txãa pa'ga i'kwe'sxa' dxus ãtximeesatxi' neewe'wenuwe, txãawe'sx na'wě yu'. Txãawe'sx dxus ãtximeesatx neewe'weni's na'wěk pta'sxi' Dxus libru': Nasa' weçxana fxiesta'jya' takhtxi ũ'na tudxna jĩ'k.

8 Txãawe'sx na'wě ptamsamée kazx pkal yu-uwa'j ji'phmeetha'w. Txã'wě yũusa' uutz teeçx enteçxáa weintitres mil nasa.

9 Kxtee ũssa maaí yu' Dxusa's juuna' ũusçxawe'wetx, aç'a' txã'wě we'wepa'ga ul weesweesa wa'kxte uutz. Nawa kwe'sxa' juuna' we'wewa'j ji'phmeetha'w Dxusa's.

10 Maaí yu' Dxusa's açewe'wetx ewmeek yũu jĩna. Aç'a' txã'wě we'wepa'ga, Dxus kaahni angel txãawe'sxtxi' ivxiituk. Nawa kwe'sxa' txã'wě açewe'wewa'j ji'phmeetha'w.

11 Txãniitey kwe'sx yaçgawe'sxtxi txã'wěk yũu, aç'a' txã'sa' Dxus librute fxi'jnik neeyũu kwe'sxwa jxpa'yakx fxi'zekahn, nmeh ensa' utx-aana u'jweça' txãa pa'ga.

12 Txã'wě Dxus yakh ew ũsthu sũhna yaakksa' jxpa'yakxwa'ja' pkalte weteya'mée.

13 I'kwe'sxtxi pkalte pětخوا'jsa pa'ja'ne' txã' u'sesa thaakwe seena' thěysameeta', jxukaysa txã'wěsaçxaçxáatx ji'phusatha'w. Nawa Dxusa's pi'kine'kwe aç'a' txã' i'kwe'sx wantãyya' çxhãçxhawa'jmeesa yu'sa' kaavxya'ja'jmeena,

wejxwa pkalte pētxwa'jsa pa'jaçpkaçxa',  
ma'wē txāa pkaluh iyuwa'ja'swa ih pu'çxhina  
Dxusa'.

14 Txāa pa'ga yakhthē'jwe'sx, dxus  
ĩtximeesatx neewe'wenijũ kasejkahn  
yu'kxpehni's mwēese'jwe:

15 I'kwe'sxa' peekx jii i'kwe adxa' kīh yu-  
upa'ga ne'tka txā'wē jxkaaja' nawa adx we'weni's  
mpa'yajkxwe.

16 Ūus miiyajkxwe: Kristo' uuççxa' txajx  
eea's pkawku aç'a' txāa uuni's kaayaki'jsa wa-  
sotewe'sxa's jxpa'gaçxa ora'ı'tha'w. Txā'wē  
yūunisa' Kristo' yakh utxaaçxa txāa yakh tx-  
utemeetha'w fxi'ze' jīnisa'. Txā'wēy Kristo'  
uuya' txajx kakwe's dukhku aç'a' txāa uuni's  
kaayaki'jsa pana's pe'ltedeçxa jtxtude'tha'w.  
Txā'wē yūunisa' Kristo' yakh utxaaçxa txāa yakh  
txutemée ihtha'w fxi'ze' jīnisa'.

17 Makwe wala kuhçxawa teeçx pana'sçxáa  
jxukaysatha'w ũ'we', txāasatha'w teeçxçxáa  
na'wēsa yuuna pa'ja'.

18 Miiyajkxwe Israelwe'sxtxi. Txāawe'sxa'  
Dxusna weçyaya' tajkx ikhni çxiçxa's ũ'sa' Dxus  
yakh txutemée fxi'zesaçxatx txā'wē yū'.

19 Txā'jīte', txā'wē yūuya' tajkx ikhnisa çxiçxte  
kīh pēthejene' sũjkahn txā'jīçmeeth, txāa  
pa'gatey dxus ĩtximeesa' kīhwa meesata'.

20 Txā'wētewa, dxus ĩtximeesatx weçyaya'  
tajkx ikhe'tx Dxus cielutewe'sxa's jīimeesa',  
aç'a' txā'wē yūuni' dxus ĩtximeesaçxáatx  
weçxanisame', eçxthē'ja's weçxanisa'. Aç'a'  
i'kwe'sxa' txā'wē eçxthē'j yakh utxaaçxa  
fxi'zenuwe jīçxath txā'wē we'we'.

21 Txã'wẽ eçxthẽ'j yakh utxaaçxa weçxana ùsçxa', Kristo puuçni mesatewe'sxa's yu' jxpa'gaya' ãjameene'kwe.

22 Kwe'sxtxi jxpe'jsa Jesukristo's kaaũusçxa'jwa'jsameetha'w kwe'sxa', txãa pa'gatey txãate jxthaakwe çxhãçxhasameetha'w naa pa'ga.

*Kĩhnawa ù'ya' ãjawa'jsatha'w, nawa jxpa'yakxwa'ja' vxitetx peeygãhçxa*

23 Isa kwe'sxa' kĩhnawa ù'ya' ãjawa'jsa yuhtha'w, nawa jxpa'yakxwa'j ji'ptha'w. Makwe kĩh ù'nawa ù'ya' ãja'nja'w nawa txã' Dxus yakh çxhãçxha fxi'zewa'j yu'sa' pu'çxhi'çmeeta'.

24 Peekx fxi'zewa'jçxá's yajxmée, vxitetxwa peeygãawa'ja' ew kfxi'ze'jya'.

25 Merkaute çxiçx ma'wësanawa weyçxa maa sũhmée ù'wa'ja',

26 txãa pa'gatey Dxus jĩçxaçxáata' naa kiwe, txã'wẽy naa kiwete ùssa kĩjkĩhwa jxuka.

27 Meeçxa' Dxusa's jiimeesa pi'kxte', i'kwe'sxa' u'jçxa kĩh puuçtewa txã'sa' ù'weçxáane'kwe maa sũhmée.

28 Nawa Dxusa's açxamée ew jiisa' na'jĩna we'wena: Naa çxiçxa' dxus ìtximeesatx weçxanisa' na' ewmeena jĩte', idxa' txã'sa' ù'meene'ga, txã'wẽ pta'sxsa's kaypuba'jya'mée.

29 Vxitesa ùus yaakxni's jxpa'yakxkahnthu we'we', iidx ùus yaakxni's we'weçmeeth.

Nawa Dxusa's sxiigmée ew jiisa' na'wẽ pëyina: Adx kĩhnawa ù'ya' ãjani's çkĩh yũuçxa vxitesa neeweya' ãjakx?



30 Adxa' kīh ũ'weççxawa Dxusa's weçxana orãÿçxath ũ'we', aça' adx ũ'ni's çkīh yūupa'ga ewmée nuywe'wetxki? jītxna.

31 Ew yuja', nawa i'kwe'sx ũ'nisa ma'k yuu kīh yūuççxawa Dxus dxi'pte selpiiwa'jsaçxá's thegçxa kxtey myūuwe.

32 Judiuwe'sx vxite' judiumeesa, meeçxa' Dxus luuçx maatzwa kaypuba'jwe'sxte' mpa'yajkxwe.

33 Adxa' na'wēçxáath pa'pçxu': peekx wēt fxi'zewa'j yu's yajkxmée, vxitesatx pu'çxwa'ja'sçxáath pakwena fxi'ze', txãawe'sx ũusa' ewte neeyūukahn.

## 11

1 Adxwa ma'wētka Kristo fxi'zeni's thegçxa fxi'ze', txã'wēy i'kwe'sxwa adx fxi'zeni's thegçxa mfxi'zewe.

### *U'ya' kultote jxpa'yakxwa'j ji'pha'*

2 Yakhthē'jwe'sxtxi weçxa'th adxa's peçxkanamée yajkççxa adx kaapiya'jnitxi' kxtey yuuna fxi'zepa'ga.

3 Nawa na'wēsa'swa mjiyuwe: Kristo' Dxusa's nwēese'jsa', aça' piçthē'jwe'sxa' Kristo's nwēese'jwa'jsata', aça' u'ywe'sxa' nmi'tx nwēese'jwa'jsata'.

4 Txã'wē yūuwa'jsaçxah maa piçthē'jwa çxua'a's ki'pmée kultote orãyna Dxus yuwe's pta'sxna ũççxa', Kristo's weeçxsa yuuni'.

5 Txã'wēy maa u'ywa dxikthe's ya'pathmée orãyna Dxus yuwe's pta'sxna ũççxa', txajx nmi'a's weeçxsa yuuni'. Txã'wē ya'pathmeete', dxkhasa's kwaaka'jni na'wēsa'.

6 U'ya' txã'wě ya'patheçmée yã'jçxa', tee-hwed dxkhasa's tee kwaaka'j. Nawa u'y txã'wě dxkhasa's kwaaka'the' thaameweçxte', tee ya'path txajx dxikthe's.

7 Piçthě'ja' dxikthe's ya'pathwa'jsame', txãa pa'gatey Dxus wedxçxak txãa na'wěysa vxit, txajx jxkaahnitx nwěese'jwa'jsa. Naapkaçxha' u'ya' piçthě'j jxkaahnitx nwěese'jwa'jsa'.

8 Dxusa' piçthě'ja's taki'jiççxa', u'y kakwejuwe'sxa's kutxi'jçxa pheu'jme', wejxwa piçthě'j kakwejuwe'sxa's kutxi'jçxak u'ya's pheu'j.

9 Piçthě'ja' pu'çxwa'jsa peejku yu', txãa pa'gaçxáak u'ya' pheu'jni yuu. U'y txã'wě pu'çxwa'jsa peejxte piçthě'ja's pheu'jni yuume'.

10 Txãa pa'ga u'ya' piçthě'ja's nwěese'jwa'jsa' jĩni dxikthete ya'pathnisa ji'phuwa'ja'. Txã'wě ya'pathwa'jsaçxah kxtey yuumeete', Dxus angeleswe'sx thegna ũsta'.

11-12 Txã'wětewa, ew ũus yajkxte yu', maa yuhwa thaakwesameeta', txãa pa'gatey piçthě'jwaçwa u'y kakwetemée peekxçxáa yu' naa kiwete upxya' ãja'çme', txã'wěy u'ywa piçthě'j ji'phmée peekxçxáa yu' naa kiwete upxya' ãja'çme'. Isa yuja' u'ya' piçthě'j kakwejuwe'sxa'sku pheu'jni yuu, txã'wěy piçthě'jwa u'y kakwetek upxya' ãja'. Txãasa maa yuhwa thaakwesamée, e'zĩ Dxus pheu'jniçxaçxáata'.

13 Txã'wě' naa pa'ga i'kwe'sx pwe'sx ũus miiya-jkxwe, aan ewna txã'wě Dxusa's orãiççxa u'ya' dxikthe's ya'pathmeete.

14 Piçthě'ja' peekx yuu dxkhas jxu'j ji'phuwa'jmeesaçxa txã'wě khyu'ja'the', thaame

yuja'.

<sup>15</sup> Nawa u'y txã'wẽ dxkhas jxu'j ji'phte', zhiçxkwesa'. Txãa pa'gatey dxikthe's aphwa'jiiçxáak dxkhas jxu'j nvxiitni yuu.

<sup>16</sup> Nawa maai' yu' dxikthe's ya'pathwa'ja's jxkaahni's wa'lsa ũsçxa', peekx ũus yaakxwa'j ji'phta'. Txã'wẽme' kwe'sx vxite' Dxus luuçx msuuwe'sx maa yuhwa jiiimeeta' dxikthe's ya'pathmée Dxusa's orãyni yu's.

*Ewmée yũuya'çxáa Santa Cena's ũ'ya' pkhaakheni*

<sup>17</sup> Na'wēsana pta'sxna fxi'jaççxa', i'kwe'sxa' ew yũusa i'kwe jina weçxaya' aja'çmeeth. I'kwe'sxa' Dxusa's weçxaya' pkhaakheni' selpiipkaçxte, wejx suwsaçxáana sũju'th.

<sup>18</sup> I'kwe'sxa' Dxusa's weçxaya' pkhaakheççxa', bagaçxtewa i'kwe'sx pwe'sx puutx fxiifxii txuteeya'çxáatx pkhaakhe' jĩ'tx aça' txã'wẽ pta'sxni' isa yuhna sũju'th.

<sup>19</sup> Pkhaakhesa i'kwe'sx pwe'sx txã'wẽ fxiifxii txuteni' ew yuhna, txajiiçxáa mtee pkhaakhesa wejx Dxus yakh ew fxi'zesatewa ya'jiiyuna.

<sup>20</sup> Nawa Jesukristo mesatewe'sxa'stha'w jxpa'ga' jiiççxa txã'wẽ fxiifxii txuteeçxa ũsni' txã' Dxus jxthãasnime'.

<sup>21</sup> Txãa pa'gatey i'kwe'sxa' ih pkhaakheççxa ja'daçxah ũ'wa'j en ajaçpkaçxha', puutx fxii txuteeçxa maai' yu' yaçte ũ'we'i'kwe, vxite jii yu' nvxihtmée. Aça' vxiteçxáa txikpkaçx meeçxawa tũunus tudxte', vxite yu' ũ'wa'j ji'phmeetx wēena neeyũ'.

22 Txã'wẽçxáa yũuççxa', i'kwe'sx yat-suywa ù'wa'jna. Txã'wẽme', vxitee ù'wa'j yu' nvxihtmeeçxa', kxũusu'ju'i'kwe, açã' puutx yaaçeniçxáak kaseje'. I'kwe'sx txã'wẽ yũuna ùste', adxa' i'kwe'sxtxi' ew yũuna ùsi'kwe jĩna ¿weçxaya' ãjama'th? Na'wẽçxáa yũute', weçxaya' ãjame'nja.

*Santa Cena's ù'wa'ja's Kristok kaapiya'jçxa nvxiht*

23 Adxa' i'kwe'sxtxi' kaapiya'th nawa Jesukristo adxa's ma'wẽ kaapiya'the' txã'wẽyçxáath kaapiya'j txã' na'wẽ': Jesusa's ikhkahn dukhwa'j kus ãjaçte', txãa kusuçte pana's kusete jxpa'gak.

24 Sa' Dxusa's weçxana orãyçxa', pe'ltedeçxa na'jĩk: Mẽ'we. Naa pana' adx kakwe's i'kwe'sx pa'gate pe'ltedenisa na'wẽsa'. Txã'wẽ myũuwe adx pxthaa yuuçxa uuni's bagaçxtewa yajkxya'.

25 Ù'na jxã'jçxa', txã'wẽy waso's jxpa'gaçxa na'jĩk: Adx eea's pkawçxa yuuçxáa i'kwe'sxtxi nwe'wewa'ja's Dxusa' u'se pheu'jçxa nvxihtku. Açã' naa wasotewe'sxa' adx ee i'kwe'sx pa'gate uwusáa na'wẽsa'. Txã'wẽ tudx iisa adx pxthaa yuuçxa ee pkawni's bagaçxtewa kaayaki'jwa'jsa' jĩnak kaapiya'j.

26 Txã'wẽ yã'the', bagaçxtewa naa pana's ù' iisa, naa wasotewe'sxnawa tudx iisa i'kwe Jesukristo uuni's yajkxna nes yu', txãa sxawedna kĩhpkaçx.

*Santa Cena's jxpa'gaya'waçxa' na'wẽ yũuwa'ja'*

27 Txã'wẽ maawa Jesukristo kaapiya'jni's kĩhwameesa na'wẽ Dxusa's yajkxmée maa sũhmée wáa pana's ù'na wasotewe'sxnawa

tudxiitxna aça' txã'wẽ yũusa' pkalte wetesá yuutxna, txã'wẽ Jesukristo kakwe vxite' txajx ee na'wẽsa's kĩhtewa seelpimeesa na'wẽçxãa yũupa'ga.

<sup>28</sup> Txãa pa'ga ũus miiyajxwe teeçxa na'wẽçxah pan vxite' wasotewe'sx txãatx jxpa'gamey.

<sup>29</sup> Txã'wẽme' nxuste wetewa'ja's peekii pakwesáa yuutxna, txã'wẽ Jesukristo kakwe vxite' txajx ee na'wẽsa txãatx kĩhtewa seelpimeesa na'wẽ maa sũhmée jxpa'gapa'ga.

<sup>30</sup> Txã'wẽ jxpa'yakxpa'gamée i'kwe'sx ksx-avxytewe'sx maaíi yu' aça'na çxhãçxhamée ũsta', naapkaçxha' vxite' uuna ũsta'.

<sup>31</sup> Peekii wala jxpa'yakxna fxi'zewaça', txã'wẽ nxuste wetewa'j en pa'jmeena.

<sup>32</sup> Nawa Dxusa' kwe'sxtxi peeygãhçxak kastigo kaja', ki'kin txã'sna pakwete', bagaçxte yuhwa Dxus yakh puutx uywa'jmeesawe'sx yakh kaajxa'mée.

<sup>33</sup> Na'wẽ' aça' aça'ha' adx yakthẽ'jwe'sx, Jesukristo mesatewe'sxa's ũ'ya' pkhaakheçxa', teeçxa na'wẽçxah puutx ya'peeygãhna ja'daçxah ũ'ya' müythaswe.

<sup>34</sup> Maaíi yu' wala wẽesa ũsçxa', txajx yatte ũ'wena, txã'wẽ puutx ya'peeygãhmée pkhaakhete', Dxus kastigãywe'sxte. Vxite yuwe ũsta' txãatxi's adx pa'jçxa pheu'ju'nja.

## 12

*Dxusna selpiwa'ja's Dxus Espiritu' nasa iisa fxiyfyiçxah ũsni*

1 Na'wē Dxus Espiritu' nasa iisa fxiyfxiyçxah Dxusa's selpiya' ājawa'ja's ūsu'k txā'sna pta'sxya'wath, aça' yakhthē'jwe'sx jxpa'yakx mwēese'jwe.

2 I'kwe'sxa' ew jii i'kwe Dxusa's jiyumeycxa', naa kiwete dxus itximeesatx i'kwe nwēese'jna fxi'ze'.

3 Txāa pa'ga āçxha' ew mjiyuwe: Jesusa' seena' ewmeesa' jīna açewe'wesa' Dxus Espiritu kwe'we'the we'wesameena. Sa' txā'wēy Jesusa' adxna jxpe'jsa' jīna we'wemeena kim yuhwa, txā'wē Dxus Espiritu kwe'we'jmeete yu'.

4 Kīhwa yūuya' ājawa'j ūsta', aça' nasa' txāatx jxpa'gatxna. Nawa txāa ājawa'jtx ūssa yu', Dxus Espiritu teeçxçá'.

5 Ma'wēwa selpiwa'j ūsta', aça' nasa iisa makwe fxiyfxiyçxah selpiiççxawa, teeçx Dxusçxáanatha'w selpi'.

6 Ma'wēwa fxiyfxiyçxah mjīwa'jwa ūsta', nawa teeçx Dxus yuuçxáak fxiyfxiyçxah mjīwa'ja'swa kaapiya'ja'.

7 Nasa iisa fxiyfxiy selpiwa'ja's Dxus Espiritu' jxukaysatx peesu'sku, nasaa nwe'sxtxi pu'çxna fxi'zekahn.

8 Dxus Espiritu' maaiitxi' Dxus yuwe's jxpubamée jiyuya' ājawa'ja'sku ūsu'. Txāa Espiritu' iicxáa maaiitxi' ma'wēwa yu'kxpejxa' ājawa'ja'sku ūsu'.

9 Txāa Espiritu' iicxáa maaiitxi' Dxusa's ūuste jxpubamée yaakxwa'ja'sku ūsu'. Vxitetxi's āça'satx nuyçxhāaçxhawa'ja'sku ūsu'.

10 Maaíi yu' kim yuhwa ājanimeesa's ājawa'ja'stxi jxpa'ga'. Sa' vxitetxi's Dxus

kĩh yũuya'watewa dxiikhẽy jiyuɕxa pta'sxya' ãjawa'ja'sku ũsu'. Vxitetxi's maa txã'wẽ Dxus Espiritute', vxite' maa Dxus Espiritumeetewa jiyuwa'ja'sku ũsu'. Aça' vxite' jxpa'ga'tx yuwe fxiysaju we'weya' ãjawa'ja's, naapkaɕxha' vxite' txãa yuwe fxiysaju we'weni's ãate pta'sxya' ãjawa'ja'stxi jxpa'ga'.

11 Nawa txã'wẽ nasa iisa fxiyfxiy selpiiya' ãjawa'ja's ũssa' Dxus Espiritu teeɕx yuuɕxá'. Txãa yuuɕxáak teeɕxsa na'wẽɕxah kĩh mjĩiya' ãjawa'jsatewa txãatx ũsu'.

*Jxukaysa teeɕxsa kakwetewe'sxɕxaɕxáatha'w*

12 Kakwewa ma'wẽ teeɕxɕxáaɕxawa kuh jwed ji'phna fxiyfxiysa, aça' Kristowa txã'wẽysa'. Makwe kuh jwed fxiyfxiysaɕxawa, kxazíi teeɕx kakwetewe'sxɕxáata'.

13 Dxus Espiritu txã'wẽ kwe'sx ma'wẽsatxwa Kristo tasxteɕxaɕxáa kuutxa'the', teeɕx kakwetewe'sxɕxáatha'w yuu. Judiu ma'k yuu meeɕxa' judiumée ma'k yuu, selpiisáa ma'k yuu meeɕxa' selpiisamée ma'k yuu nawa txãazkuéesay Dxus Espiritu teeɕxɕxáa ũsa' txãaɕxaɕxá'stha'w jxpa'ga' jxukaysa.

14 Kakwe' teeɕx jwedsa yakhɕxáa kakwe yuuna pa'ja'ɕme'; wala kuh jwed ji'pha'.

15 ɕxida' we'wewaça', na'jĩna: Adxa' kusemeeth, sa' txãa pa'ga kakwetewe'sxmeeth jĩna nawa txã'wẽ kusemeeɕxawa kakwetewe'sxiɕxá'.

16 Meeɕxa' thũ'wẽ' we'wewaça', na'jĩna: Adxa' yafxmeeth, sa' txãa pa'ga kakwetewe'sxmeeth

jĩna nawa txã'wẽ yafxmeeçxawa kakweteywe'sxíçxá'.

17 Txã'wẽ kakwe' jxuka yafxçxaçxáawaça', çma'wẽ wẽse'jya' ãjakxtha'w? Meeçxawa kakwe' jxuka wẽse'jnisaçxaçxáawaça', çma'wẽ jxputaya' ãjakxtha'w?

18 Nawa Dxusa' kwe'sx kakwetewe'sx kuh jwedku ki'p, kĩhçxahne' peeix yu' txãatxi' jxuka.

19 Teeçx jwedsaçxáawaça', çma'wẽ kakwe' selpiiya' ãjakx?

20 Txã'wẽ kakwetewe'sxa' kuh jwedsaçxawa teeçx kakweteçxaçxáatx jxukaysa selpi'.

21 Yafxa' kuse's we'weçxa': Idxa'sa' jxpee-jxmeeth çjĩya' ãjama'k? Txã'wẽy dxikthewa çxidatx we'weçxa': Idxa'sa' jxpeeixmeeth çjĩya' ãjama'k?

22 Txã'wẽmée wejxwa kakwetewe'sx kĩhtewa seelpimeesa na'wẽçxawa, txãáiçxáa jxthaakwe jxpeejsata'.

23 Kakwetewe'sx jxthaakwe yu' peejinimeesa-wa ũsta', makwe txã'wẽtewa txãatxwa jxpa'yaki'tha'w. Sa' txakwe zhiçxkwe pheu'jna jxpe'jwa'jmeesa'swa ewtha'w pheu'ju', jxthaakwe yu' peeixmeesa na'wẽsatawa.

24 Dxusa' txã'wẽk jwee peeixmeesa na'wẽsatxwa ki'pna kakwe's pheu'j, txãáiçxáa jxthaakwe selpiwa'jsa.

25 Txã'wẽ kakwetewe'sxa' puutx yahçemée kx-aazkuẽy ja'daçxah puutx ya'pu'çxwa'jsata'.

26 Kakwetewe'sx teeçx jwedsa pxthaa yuuçte', vxitewa jxukaysa nxus pu'çxhi'tx. Kakwetewe'sx teeçx jwedsa peeYGãani yuuçte', vxitewa weçxweçxatx yaakx pu'çxhi'.



27 Æçxha' mjiyuwe: i'kwe'sxa' nasa iisa teeçxsa na'wêçxah Kristo kakwete selpiisáa i'kwe.

28 Txãa pa'gak Dxusa' txajx luuçxtxi' fxiyfxiy selpiwa'ja's peesu's teeçxsa na'wêçxah: Nyafxtewe'sxa' Kristo jxkaahnisawe'sxtxi yuu. E'stewe'sxa' Dxus kîh yũuya'watewa dxiikhêy jiyuçxa pta'sxwa'jsatx nvxiitni yuu. Tekhtewe'sxa' kaapiya'jwa'jsatx nvxiitni yuu. Txajũ' kim yuhwa ãjanimeesa's ãjawa'jsatx nvxiitni yuu. Naapkaçxha' vxite' ãça'satx nuyçxhãaçxhaya' ãjawa'jsatx nvxiitni yuu. Vxite' kîhteçxáawa pu'çxya' ãjawa'jsatx nvxiitni yuu. Vxite' jxkaahwa'jsa nvxiitnitx yuu, naapkaçxha' vxite' yuwe fxiysaju we'weya' ãjawa'jsatx nvxiitni yuu.

29 Jxukay yu' Kristo jxkaahnisatewe'sx yuumeeta'. Jxukay yu' Dxus kîh yũuya'watewa dxiikhêy jiyuçxa pta'sxsa yuumeeta'. Jxukay yu' kaapiya'jsa yuumeeta'. Jxukay yu' kim yuhwa ãjanimeesa's ãjawa'jsa yuumeeta'.

30 Jxukay yu' ãça'satx nuyçxhãaçxhaya' ãjawa'ja's jxpa'gasa yuumeeta'. Jxukay yu' yuwe fxiysaju we'weya' ãjawa'jsa yuumeeta'. Jxukay yu' txã'wê yuwe fxiysaju we'weni's áate pta'sxya' ãjawa'jsa yuumeeta'. ¿Txã'wê meetxna' wakx?

31 Selpiiya' ãjawa'j maaçxah wejx thaakwe peejxsatxna txáatx mpaakwewe. Nawa adxa' txáate jweeíçxáa thaakwe peejxsa's pta'sxya'wath.

## 13

*Peeygãanisa yuuçxáa kîhtewa thaakwe*

*walasa'*

<sup>1</sup> Adxa' makwe seena' wala zhiçxkwe we'weya' jii yu'nja naa kiwete nasa walasa na'wě, txã'wěy angeleswe'sxte ja'da, nawa peeygãawa'j yu'sa' ji'phméé yu'nja açá' adx we'weni' kîhte yuhwa selpiimeena.

<sup>2</sup> Dxus kîh yũuya'watewa dxiikhêy jiyuya' ãjawa'ja's ji'ph yu'nja, sa' kim yuhwa jiyunimeesa kîjkîhnawa jxuka jiisa yu'nja, sa' txã'wěy Dxusa' pu'çxhina sũhwa'j yuuçxá's ũuste yajkxçxa vxiç walatxwa fxiite ki'pxa' ãjawa'ja's ji'phu'nja, nawa peeygãawa'j yu'sa' ji'phméé yu'nja açá' makwe txã'wěsaçxawa kîhte yuhwa seelpimeesa yu'nja.

<sup>3</sup> Txã'wěy adx ji'phuni's kîjkîhnawa jxuka jxtxuude'nja, sa' adx kakwe yuhnawa kabkahn dukhma'th, nawa peeygãawa'j yu'sa' ji'phmeete', kxul yuh txã'wě ya'yuuna.

<sup>4</sup> Maawa peeygãawa'ja's ji'phsa', ũusçxa yaaki'çme', maa yakhwa jxuka ewsa', maa yuhtxwa açe'çme', iiwejçx yaaki'çme', iiwejçx we'we'çme',

<sup>5</sup> vxitetx juuna' yũ'çme', peekx wět fxi'zewa'j yu's pakwe'çme', ũusçxa'çwame', açeyaaki'çme'.

<sup>6</sup> Pkalte vxite weteçte', txãawe'sxtxi npeevxysxijkana weçxa'çme', naasáa ew fxi'zeniçxá'sku wět wět yajkxna weçxá'.

<sup>7</sup> Makwe kîhwa thêysa pa'thewa ũukh yajkxmée peeygãawa'jçxá's ji'phçxa' jxukak wantai', Dxusa' pu'çxhina sũhna.

<sup>8</sup> Dxus kîh yũuya'watewa dxïikhêy jiyuçxa pta'sxna fxi'zenisa' pçuwa'j en ãjana, açá' peena

yu' txã'wẽ yũuwa'j peejxmée yuuna, açã' yuwe fxiysajuwa ya'we'wemeena. Kĩhtewa jxuka jiith sũhnisawa pçuuna. Nawa peeYGãanisa yu' bagaçxte yuhwa pçumeena.

<sup>9</sup> Txãa pçuwa'jsa le'çxkwesaçxáatx jxpa'gaçxa ji'ptha'w, txãasatha'w jxuka pta'sxya' yu' aja'çmée.

<sup>10</sup> Nawa kĩhtewa peejxmée jxuka jiyuwa'j en ãhte', txãa pçuwa'jsa le'çxkwesatx ji'ptha'w txã' skhẽuutxna.

<sup>11</sup> Adxa' luuçxteya' jiiimée luuçx we'weniçxáatxthu we'we', sa' luuçx ũus yaakxniçxáatxthu ji'phu', sa' luuçx na'wẽçxáath jii fxi'ze'. Nawa jxuka thẽ'jsa yuuna kãhçxa', luuçx na'wẽ jiiimée fxi'zeni's nvxihtthu.

<sup>12</sup> Txã'wẽy içxáatha'w ãçxhí yu' ew jiyu'çmée, çxhi'dxte speejute thegte ma'wẽ psxũuçxáa vxyaakx txã'wẽçxáatha'w uyu'. Nawa kĩhte yuhwa peejxmée jxuka ew jiyuwa'j en ãhte', seena' ew puutx pdxi'p ãate uyu'nja'w. ãçxhí yu' jxukamée le'çxkweçxáa jiith. Nawa txãa jxuka jiyuwa'j en ãhte', kĩhte yuhwa peejxmée jxuka jiyu'nja Dxuswa ma'wẽ adxa's ew jiina txã'wẽy.

<sup>13</sup> Khĩ'jii pta'sxthu txãaçxáa pçuute', na'wẽsa tek hũsta' txãa yu' bagaçxte yuhwa skhẽwwa'jsameeta': Dxusa' pu'çxhina sũhna yaakxnisa, vxite' Dxus yakh puutx uywa'ja's ũythasna fxi'zenisa, vxite' peeYGãhna fxi'zenisa. Nawa txãa tekhsatx kxsusthu txãate thaakwesa' peeYGãhna fxi'zenisa'.

# 14

## *Yuwe fxiysaju we'weni' nasatxi' selpi'çme'*

<sup>1</sup> Nyafxte' peeygãawa'ja's khuẽ'y wejx thaakwe mpa'pçxuwe. Txãa e'su mpaakwewe ma'wẽ selpiwa'ja'swa Dxus Espiritu ũsu'k txãatx. Nawa i'kwe'sxtxi Dxus we'weni's pta'sxya' ãjanisaçxãa wejx seelpisa'.

<sup>2</sup> Txã'wẽme', maawa yuwe fxiysaju we'wesa' nasa yakhmée, Dxus yakhçxãa ne' we'we' jiyuwa'jmeesa's Dxus Espiritu kwe'we'jni, aç'a kim yuhwa jiyu'çmeeta'.

<sup>3</sup> Naapkaçxha' i'kwe'sxtxi Dxus we'weni's pta'sxxa', naa kiwete nasatx kaajiyu'ju'k Dxus yakh çxhãçxha fxi'zewa'ja's vxite' nxuste fxi'zeçtewa kvxiisxa'jna.

<sup>4</sup> Yuwe fxiysaju we'wesa' peekiçxãak Dxus yakh çxhãçxha fxi'zewa'ja's ya'jypa'ga'. Nawa Dxus we'weni's vxitetx pta'sxxa', Dxus luuçxtxi kçxhãaçxha'jsa'.

<sup>5</sup> Yuwe fxiysaju we'weya' jxukaysa ãjawaça', wala yuh ewna sũju'th adxa'. Nawa Dxus we'weni's vxitetx ãate pta'sxya' ãjani'sthu wejx thaakwe jxthãasu'. Txã'wẽ yũunisaçxãa thaakwe ewsa'. Meeçxa' txã'wẽ yuwe fxiysaju we'wesa ũste', pukate vxite ãate kaajiyu'the yu' ew yuhna, txã'wẽ yu' Dxus luuçx jiyutxna Dxus yakh çxhãçxha fxi'zewa'ja's.

<sup>6</sup> Yakhthẽ'jwe'sx, ũus miiyajkxwe: Adx pa'jçxa yuwe fxiysaju we'wete', i'kwe'sxa' çkĩhçxá' jiyuya' ãjama'kwe? txã'wẽ kwe'sx we'wenimée yuwejuçxãa we'wete'. Nawa Dxus we'weni's pta'sxiççxa', kwe'sx we'weni yuweju

kaapiya'jna äate kaajiyu'the yuuçxáa i'kwe'sxa' ew jiyune'kwe Dxus jxkaahnitx.

<sup>7</sup> Na'wēsax miiyajkwē: músika tukanisa kuvxy vxite' kxtala txāatx ma'wēwa ksuusu'the', ya'jiyumeena mem ma'wēsa's tukaçtewa.

<sup>8</sup> Txā'wēy gweçxate puiiya' u'jwa'ja's ew kaajiyu'jna korneta's äate tujkameete', kim yuhwa jiyumeexa' pheu'jmeetxna puiiwa'ja's.

<sup>9</sup> I'kwe'sx yakhwa txā'wēyçxá'. Yuwe fxiysaju we'wete', ¿ma'wē ya'jiyukx kīh we'weçtewa? Ya'jiyumeena aça' kxul yuh yuuna.

<sup>10</sup> Isa naa kiwete' yuwe ma'wēsawa ūsyuhta'. Nawa maa yuhwa txāawe'sx pwe'sx puutx we'weya' ājanimeesa yu' meetxna.

<sup>11</sup> Maawa adx yakh we'weççxa', adx we'weni yuwe jiyunisaju we'wemeete', txāa yakha' puutx we'weya' ājame'nja nasa fxiysa na'wē. Aça' txāawa adx yakh puutx we'weya' ājameena nasa fxiysa na'wē.

<sup>12</sup> Txāa pa'ga i'kwe'sxa' nakwe wala kījxa'wa ājawa'ja's pakwe'i'kwe na' Dxus luuçtxxi kçxhāaçxha'jwa'jsaçxá's mpaakwewe.

<sup>13</sup> Txā'wē yā'the', yuwe fxiysajuçxáa we'wesa' Dxusa's mpi'kxwe txāa yuwe fxiysaju we'weni's nasatx äate kaajiyu'jya' ājaya'.

<sup>14</sup> Txā'wē yuwe jiyunimeesaju Dxusa's orāyçxa', ūuste yu' Dxusa's yajkwē txā'wē ya'yuuna, nawa kīh we'weçxawa txāa yu'sa' ya'jiyumeena.

<sup>15</sup> Txā'wēte', ¿ma'wē wejx ewki? Ūusteçxáa Dxusa's yajkwē txā'wē yūumée, kīh we'weççxawa txā'snawa jii txā'wē yuuní wejx

ewna. Meeçxawa Dxusa's yajkxna memuuçça', txã'snawa yuwe jiyunisaju memwa'jna.

16 Idxa' txã'wē yuwe jiyunimeesajuçxáa Dxusa's weçxana tuuthe'jene'ga aç'a nasa jiimeekwesa kxte ũssa' idx yakh ja'da Dxusa's weçxana tuuthe'jya' ãjameetxna, kñh we'weçtewa jiyumeeçxa'.

17 Dxusa's weçxana orãyni' idx yakh yu' wala yuh ewna, nawa vxite yu'sa' selpiimeena.

18 Dxus pu'çxte adxa' vxite yuwe fxiysaju we'weya' i'kwe'sxte jxthaakwe jiith.

19 Nawa yuwe jiyunimeesaju wala jxu'j we'wena ũs na'wē', wejxwa Dxus luuçx ksxavxyte ũsçxa', yuwe jiyunisaju jxu'jmeekweçxáa kaapiya'jna we'wewaççxáa ewna sju'th.

20 Yakhthē'jwe'sx, luuçx le'çxkuē na'wē yuuna fxi'zenuwe. Naasáa ewmée yūuwa'j yuuçxá's kñh yuhwa yajkxmée mfxi'zewe luuçx le'çxkuē na'wē. Nawa jxpa'yakx fxi'zewa'j yu's thē'jsa na'wē ew yajkxna mfxi'zewe.

21 Yuwe fxiysaju we'weni' thaakwe selpiwa'jme's Dxus librute na'jĩ'k: Vxite ajūwe'sxtxi kwe'we'je'nja yuwe jiyunimeesaju naa nasatx pta'sxna. Nawa makwe txã'wē yūutewa, nwēese'jmeetxna jĩ'k.

22 Txã'wē yuwe jiyunimeesaju we'wenisa' Dxusa's weeçxsawe'sx Dxus ũsyuhna sūhna kaayaki'jwa'jsaçxá', sa' Dxusa's jiiyã'jsawe'sx jii me'. Naapkaçxha' Dxus we'weni's pta'sxya' ãjanisa', Dxusa's jiisa ũstxna txãawe'sx jiiçxá'. Dxusa's weeçxsawe'sx jii me'.

*Kĩh yũuçxawa teeçx teeçxçxah we'wewa'ja'*

<sup>23</sup> Txãa pa'ga Dxus luuçx jxukaysa pkhaakheçxa kxazíi yuwe fxiysa yakh susna ũste', maaíi yu' Dxus Espiritu kwe'we'jnitewa jiimeesa kũhçxa', luuku yuuna ũsta' çjiimeema'k?

<sup>24</sup> Nawa jxukaysa Dxus we'weni's äate pta'sxna ũsune'kwe aç'a' maaíi yu' ekajuwe'sx kũhçxa ũssa' jiyuna txajx pkalte fxi'zena ũsni's, i'kwe'sx txã'wẽ Dxus we'weni's äate pta'sxna ũspa'ga.

<sup>25</sup> Txãa pa'gatey i'kwe'sx äate we'weni' txajx ũus yaakxnitxi' kpaakitxna, aç'a' kũiçhuçxa Dxusa's na'jĩna weçxaana: Dxusa' isa i'kwe'sx yakh yuh ũsu'ga jĩna.

<sup>26</sup> Txã'wẽ yã'the', na'wẽ myũuwe yakthẽ'jwe'sx: i'kwe'sx yakh pkhaakhena ũssa maaíi yu' Dxusa's weçxana memwa'j wáa ji'phtxna, vxite' kaapiya'jwa'j wáa ji'phtxna, meeçxawa Dxus we'weni's wáa kaajiyu'jwa'j ji'phtxna. Naapkaçxha' vxite' yuwe fxiysaju wáa Dxusa's weçxawa'j ji'phtxna, meeçxa' txãa yuwe fxiysaju we'weni's wáa äate pta'sxwa'jsa ũstxna, aç'a' txã'wẽ yũutewa, ew yuhna Dxus luuçxtxi selpiwa'jsate yu'.

<sup>27</sup> Yuwe fxiysaju we'weççxa', e'z meeçxa' tekx kxazçxáa we'wewa'ja' teeçx teeçxçxah. Nawa txãa yuwe fxiysaju we'wenisa's äate kaajiyu'jwa'jsa ũsteçxáa txã'wẽ yũuwa'ja'.

<sup>28</sup> Nawa äate kaajiyu'jwa'jsa kimwa meete', yuwe fxiysaju kuçx we'wenuwe txãa pkhaakhenite. Kxãanpasa' yuwe fxiysaju Dxusa's weçxa wẽjeççxa', iidx ũusteçxáa weçxana mneeyũu.

29 Meeçxa' Dxus we'weni's pta'sxwa'j wáa yu-una nawa e'z tekh kxazçxáa mwe'wewe, naap-kaçxha' wēse'jna u'psa' jxpa'yakx wēse'jetxna Dxus we'wenitewa jiyuya'.

30 Meeçxawa wēse'jna u'psa's Dxus we'wewáana pta'sxkahn, aça' yaçte we'wesa jxã'jpkaçx üythasçxa we'wewa'ja'.

31 Txã'wē Dxus we'weni's jxpa'gasa' jxukay pta'sxya' äjane'kwe, nawa vxite we'wena jxã'jpkaçx üythasçxa teeçx teeçxçxah. Txã'wē yũute', jxukaysa piyaçxa Dxus dxi'pte wejx çxhãçxha fxi'zene'kwe.

32 Txãa pa'gatey Dxus we'weni's jxpa'gasawe'sxa' txãawe'sx ũus yaakxni's jxpa'yakxwa'ja', ma'wēwa ũusutheni's we'wemée.

33 Txã'wēme', Dxusa' txã'wē kaypuba'jna susna ũswa'jsame'. Ma'wēta Dxusa's yaakxsa msuuwe'sxwa susmée fxi'ze', txã'wēy fxi'zewa'ja'.

34 U'ywe'sxa' pkhaakhena ũsni kultote' paapējxna susna ũswa'j ji'phmeeta'. Txã'wē yũumée, jxpa'yakx wēse'jwa'j ji'phta' kulto ki'puçte', Dxus ley ma'wē jxkaathe' kxtey yuuna.

35 Kîh paapēywa'j ji'phçxa', yat-su pa'jçxa txãawe'sx nmi'tx pēyitxna. Weh yuhwa ewme' u'ywe'sx txã'wē kultote susna ũste'.

36 I'kwe'sxa' iiwejçx yajkxna ma'wēwa yu-uwa'j ji'phmeei'kwe. Txã'wē yuukahmeni' Dxus yuwe' i'kwe'sx tasxu nyafxçxah kasehme', aça' i'kwe'sxçxáa Dxus yuwe's jiisa ũsmeei'kwe.

37 Na'wē we'wena fxi'jaçthu txã' Dxus jxkaahnita', aça' Dxus we'weni's



jiyusa ūswá'kwe meeçxa' Dxus Espiritu kaaũusuthe'jni's jxpa'gasa ūsçxa', peekx mjiyuwe.

<sup>38</sup> Nawa txã'wẽ jxkaahna fxi'jnitxi' kxtey nwẽese'jmeena aça' txãa nwẽese'jsame's jxpa'gameete ewna.

<sup>39</sup> Yakhthẽ'jwe'sx, na'wẽ myũuwe: Dxus we'weni's ãate pta'sxwa'jçxá's wejx miijaxkwe. Nawa yuwe fxiysaju we'weni's yup yu' meeçxawa,

<sup>40</sup> kultote kîhwa susmée zhiçxkwe teeçx teeçxçxah we'wena meswe.

## 15

### *Jesukristo ki' ïtxi yuuni*

<sup>1</sup> Æçha' na'wẽ Kristo yuwe ewte nvxiitwa'jsa's pta'sxthu txã' ma'wẽsatewa ew kaajiyu'jya'wath yakthẽ'jwe'sxtxi. I'kwe'sxa' txãa pta'sxni's jxpa'gaçxa txãajũ txutemée ūsi'kwe.

<sup>2</sup> Txãa Kristo yuwe ewsapa'ga i'kwe'sxa' nwe'weni ewte neeyũuwa'jsai'kwe, adx pta'sxni's kxulteçxáamée ūusuh jxuka jxpa'gaçxa yu'.

<sup>3</sup> Kristo yuwe ewte nvxiitwa'jsa jïni's adxna ma'wẽ kaapiya'the' i'kwe'sxtxiwa txã'wẽyçxáath kaapiya'j txã' na'wẽk yu': Dxus librute ma'wẽne' fxi'jni ūsu' aça' txã'sa' kxtey yuuna Kristo' kwe'sx pkalsa pa'gate uuk.

<sup>4</sup> Txajũ' pedaniik yuu nawa tekh ente' ki' ïtxi yuuk, Dxus librute ma'wẽne' fxi'jni ūsu' txã'wẽy.

<sup>5</sup> Ki' ïtxi yuuçxa', Pedro's vxyaak. Txajũ' vxite txajx jxkaahnisa docesatxwa vxyaak.

6 Txãa e'su' yakhthê'jwe'sx kinientos thaak-wetx ũsu' teeçx ahte txãatxwa vxyaak, aça' txã'wê uysá' wala kuh nee ãtxiyta' makwe vxite' yu' uutewa.

7 Txãa e'su ki' vxyaaçxa', Jakobo'sku vxyaa, sa' txajx jxkaahnisatxwa ki' vxyaak jxukaysatx.

8 Nmehte' adxnawa vxyaak, adxa' en ãhmeey upxsa seelpimeesa na'wêsatewa.

9 Txãasa adxa' Jesus jxkaahnisatewe'sx vxite yakh yu', wala ãhmeekwesath, sa' Jesus jxkaahnisa na'wê yuuwa ya'kxsuswa'jmeesath, txã'wê Dxus luuçtxith ahçena fxi'ze naa pa'ga.

10 Makwe txã'wêsatewa, Dxusa' adxa's peeygãhçxa txhitxhku txajx peeygãani' kxul yuume' adx yakh. Txã'wêsaçxawa adxthu vxitesate wejx jxthaakwe mjïi. Nawa ew yajkxte yu' txã' adxçxáa mjïinisa yu'çme', Dxusku adxa's peeygãhçxa txutemée ũsu' txãa pa'gaçxáath txã'wê mjïi.

11 Nawa txãa yu' kîh yuumeena, Jesus jxkaahnisawe'sx ma'tx jxthaakwe mjïi, meeçxa' adx ma'th jxthaakwe mjïi. Nawa jxukaysa fxiymée txã'wêçxaçxáatha'w Kristo nwe'wewa'ja's pta'sxi', aça' txã'sna i'kwe i'kwe'sxa' ũuste jxpaga.

### *Uusaawe'sx ki' ãtxi yuuwa'j*

12 Kwe'sx pta'sxni' Kristo ãtxi yuuni'sku kaajiyu'jni yuu aça' i'kwe'sx yakh ũssa maái yu' çma'wêta uusaawe'sxa' ãtxi yuuwa'jsameeta' jïna we'we'?

13 Uusaawe'sx ãtxi yuuwa'jsameete', Kristowa ãtxi yuumeene'ga.

14 Kristo ïtxi yuumeete', kwe'sx pta'sxni' kxul yuhna, aça' Kristo' kwe'sxtxi nwe'wesa' sũhna i'kwe'sx yaakxnisawa kxul yuhna.

15 Txã'wẽ Kristo' ïtxi yuumée wá' aça' kwe'sxa' Dxus dxi'pte ïsxiisa yu'nja'w, Dxusa' Kristo's ïtxi vxitku jĩna pta'sxpa'ga. Txã'wẽ uusaawe'sx ïtxi yuuwa'jsameete', Dxuswa Kristo's ïtxi vxit-meene'ga.

16 Na'jĩ'th na': uusaawe'sx ïtxi yu-uwa'jsameete', Kristowa ïtxi yuumeene'ga.

17 Sa' Kristo ïtxi yuumeete', i'kwe'sx ũuste yajkxçxa Kristo' kwe'sxtxi nwe'wesa' sũhnisa' kxul yuh yuune', aça' i'kwe'sx pkala' ãçxpkaçx Dxus peltunãynimée ũstxna.

18 Txã'wẽ ïtxi yuumée wá' aça' Kristo's ũuste jxpa'gaçxa uusaawe'sxa' vxitune'ta.

19 Kristo yakh fxi'zeni' naa kiweteçxáa selpiwa'jsate', maatewa jxthaakwe kxulsa' kwe'sx ne'tka'w.

20 Nawa txã'wẽme'. Kristo' ïtxi yuuyujk. Uusaawe'sx nyafxte ïtxi yuusa' txãak yu'.

21 Ma'wẽga naa kiwete uuwa'jwa teeçx nasate takh, txã'wẽy uuçxa ki' ïtxi yuuwa'jwa teeçx nasatek takh.

22 Teeçxsa Adanpa'gaçxáa jxukaysatx uuwa'ja's ji'phu, txã'wẽy teeçxsa Kristopa'gaçxáa jxukaysatx ki' ïtxi yuuwa'ja'swa ji'phu.

23 Nawa txãawe'sx ïtxi yuuwa'j en ähte fxi-ixiiçxah ïtxi yuutxna. Nyafxte' Kristo khuẽ'yku yaçte ïtxi yuu. Txãa e'suh Kristo ki' kũijana naap-kaçx Kristo's jxpa'gaçxa uusaawe'sx ïtxi yuutxna.

24 Txãa e'su nmehsa pa'jana, txajũ Kristo' naa kiwetewe'sx vxite' cielutewe'sx ma'tx yuu nawa

kĩh yuhwa nvxihtméé jxuka kaapçu'ju'jçxa txajx jxkaahni's jxuka dukhena Neyá's, txãa yuuçxáa jxkaakhan.

<sup>25</sup> Nawa txã'wě yuume yu' Kristo khuě'y jxkaahwa'jsa', txã'wě Dxusa' açesa jxukaysatx Kristoçxaçxá's nwěese'jwa'ja's vxitpkaçx.

<sup>26</sup> Txã'wě jxukaysatx Kristoçxaçxá's nwěese'jwa'ja's vxitçxa, nmehte' uuwa'ja'swa Dxusa' ivxiituna.

<sup>27</sup> Dxus librute we'weçxa': Jxukaysa Kristo's nwěese'jwa'jsata' jĩ'k açá' Dxuswa Kristo jxkaahni yuuna sũjuwá'kwe, nawa txã'wěme'.

<sup>28</sup> Açesa jxukaysa Kristoçxaçxá's nwěese'jeçpkaçxha', Dxus Nçxi'k Kristoíiwa Ney tasxte nwěese'jya' ya'dukhena Ney makwe ne' ũs petx txãa yã'jçxa jxuka. Txã'wě yũute, Dxusa' txãaçxaçxáa jxkaajana.

<sup>29</sup> Txã'wě uusaawe'sx ĩtxi yuuwa'jsameete', çkĩjxa'çxáata txã'wě ya'bautisaĩ ĩtxi yuuwa'ja's yajkçxa?

<sup>30</sup> Txã'wě ĩtxi yuuwa'jmeete', kwe'sxa' çkĩjxa'çxáatka'w een isa ikh wěeni fxi'ze', ĩtxi yuuwa'ja's pta'sxna kxulteçxáa?

<sup>31</sup> Adxa' txã'wě yuh een isa ikh wěeni fxi'ze'th txã' ĩsxiinime'. Nawa, yakthě'jwe'sx, Jesukristo's ũuste ji'phi'kwe txãa pa'gaçxáath txã'wě yu' weçxana.

<sup>32</sup> Efxesotewe'sxa' yu'kh eçx na'wě seena' weesweesata' jĩ'tx txãawe'sx yakh iipuiith. Nawa adxa' çkĩh yũuçxatka uuwa'ja's ũukhu'çmée? Txã'wě uuyã'jçxa' peena yu' ĩtxi yuuwa'jmée dxihte', isa yuh we'we'ne'ta

na'wě we'wesa': Ũ'na tudxna fxi'zega, uuçxa kxtee pçuwa'jsaçxáatha'w jīsa'.

<sup>33</sup> Txã'wě ĩtxi yuuwa'jme' jīni's txã'wě dxihna sūhna jxpubanuwe. Txã'wěme', namikuwe'sx ewmeesa' kaypuba'jatxna ew fxi'zesa's jī'tx txã' kxtey yuuna.

<sup>34</sup> I'kwe'sxa' jxpubamée fxi'zenite sxawedçxa, peena yu' pkalte fxi'zenuwe. Txã'wě yūumeçxa' i'kwe'sx maai' yu' āçxpa'jwa Dxusa's jūimeei'kwe. Txã'wěth āate we'we' thaameçxa jxpa'yakx fxi'zekahn.

*¿Uusáa ki' ĩtxi yuuwa'ja' ma'wěkx?*

<sup>35</sup> Nawa maai' yu' pēyi'wáatxna na'jīna: Uusáa ki' ĩtxi yuuwa'ja' ¿ma'wěkx? Kakwe ¿ma'wěsa jī'phutxki? jītxna.

<sup>36</sup> Jiyuya' āja'çmeewá'kwe. I'kwe'sxa' peekx jūine'kwe kīh nxinx'swa uuhte', txāa nxinx kajk-wekhēwe'sxa' çxibi'k, naapkaçxha' dxiitewe'sx ũusçxáak buçxá'.

<sup>37</sup> Skuutxh nxinx ma'k yuu meeçxa' fxtūu nxinx ma'k yuu nawa uuhte' txāa nxinxíçxáa āate kāawa'jsame', txāa nxinxte ũusçxáa buçxawa'jsa'.

<sup>38</sup> Aça' txāa nxinxuh buçxasa' kakwe ma'wěsaçxah jī'phuwa'jsatewa txã'wěsak Dxusa' ũsu', kīh nxinxte'wa txāa iisa fxiyfxiyçxah.

<sup>39</sup> Txajīi kakwe ma'wěsawa ũsta', nawa txã'wěçxaçxáa meeta'. Nasaa kakwe' fxiyta', aça' niimal kakwewa fxiyta'. Txã'wěy fxiusáa kakwewa fxiyta', aça' yu'gawe'sx wedx kakwewa fxiyta'.

40 Txã'wëy ãe walatewa ũsta', naapkaçxha' naa kiwetewa ũsta'. Nawa ãe walatewe'sxa' fxiy zhiçxkweta' naa kiwetewe'sxte.

41 Sek kweethni vxite' a'te kweethniwa fxiyta'. Txã'wëy estrelxa kweethni vxite' sek kweethniwa fxiyta'. Sa' estrelxa pwe'sx kweethniwa puutx fxiyçxaçxáata'.

42 Txã'wëy kwe'sx kakwewa fxiy yuuwa'jsa' ki' itxi yuunijũ'. Uute', kakwe pçuwa'jsa's ya'peda'k, naapkaçxha' txãa pedaniijũ ki' itxi yu'k peena yu' uuwa'jmée kakwe yakh.

43 Kakwe kazxsa's ya'peda'k, nawa txajũ ki' itxi yuuçxa', seena' zhiçxkwesak yu'. Kakwe selpimeesa'sku ya'peda', nawa txãajũ ki' itxi yuuçxa bagaçxte yuhwa pçumée selpiwa'jsak yu'.

44 Naa kiwete fxi'zeni kakwe' vxite', açã' Dxus tasxte fxi'zewa'j kakwewa vxite'. Txãa pa'ga kakwe naa kiwetewe'sxa's ya'peda'k, naapkaçxha' ki' itxi yuusáa kakwe' Dxus tasxte ũswa'jsa'.

45 Txajjik Dxus librute we'weçxa': Nyafxte piçthë'j Adana' naa kiwete itxi fxi'zewa'ja'sçxáak ji'phu' jĩ'. Nawa nmehtewe'sx Adana' pçumée itxi fxi'zewa'ja's peessa'.

46 Nawa nyafxte kakwe' Dxus tasxte fxi'zewa'jsa yu'çme'. Nyafxtewe'sxa' naa kiwete fxi'zeni kakweçxáak yu', naapkaçxha' nmehte kakwe' Dxus tasxte fxi'zewa'jsa'.

47 Nyafxte piçthë'j Adana' kiwe'sku pheu'jnisa yu' naa kiwetewe'sx, naapkaçxha' e'stewe'sxa' Kristok yu' cielujũwe'sx.

48 Naa kiwete jxukaysa nasaa kakwe' nyafxte Adan kakwewa ma'wēga kiwe yu', txã'wēysa iïçxáata', naapkaçxha' cielute ũswa'jsa kakwe' cielujūwe'sx kakwe na'wēy yuuwa'jsa'.

49 Ma'wētk'a'w ãçxwa nyafxte Adan kakwe's iïçxáa ji'phuya' āja', txã'wēy Kristo kakwe's iïçxáa ji'phuya' āja'nja'w txã'wē yuuwa'j en āhte'.

50 Yakhthē'jwe'sx, i'kwe'sxtxi āateth pta'sxi': Naa kakwe yakha' cielute Dxus jxkaahnite u'kaya' ya'ājameena. Naa kiwete pçuwa'jsa' çma'wē bagaçxte yuhwa pçuwa'jmée i'txi fxi'zenite ũsya' ājakx?

51 Āçxha' pta'sx ya'wath: Maaíi yu' nee uumée ũssa' naa dudte korneta tukani nmeh susuçpkaçxha', naa kakwe's yu'pthehni yuuçxa vxite kakwe jxpa'ga'nja'w jxukaysa.

52 Txã'wē korneta susuçpkaçxha', uusaawe'sxa' ki' i'txi yuutxna peena yu' uuya'mée, naapkaçxha' naa dudte yaakxni yuumeete nee uumée i'txi ũssa kakwe' yu'pthehni yuutxna.

53 Txãa pa'gatey kakwe pçuusáa uuniijū' vxite kakwe bagaçxte yuhwa pçuwa'jmeesa's jxpa'gawa'j ji'pha'. Sa' kwe'sx kakwe uuwa'jsa's yu'pthehçxa bagaçxte yuhwa uuwa'jmeesa's jxpa'gawa'ja'.

54 Txã'wē kakwe pçuusá' vxite kakwe bagaçxte yuhwa pçuwa'jmeesa's jxpa'gaçxa kwe'sx kakwe uuwa'jsa's yu'pthehçxa bagaçxte yuhwa uuwa'jmeesa's jxpa'ganijū' Dxus libroute we'weçxa': Uuwa'ja's ivxiitunik yuu, peena yu' uu en pa'khamen jĩ'k txã' kxtey yuuna.

<sup>55</sup> Uuwa'ja' bagaçxte yuhwa mee yuukahn jxuka ivxiitute', çma'wẽ uuwa'j en pa'ja'kx uuwa'ja's ji'phuwa'jsamée yã'jsa's?

<sup>56</sup> Uuwa'j ena' pkalpa'gaçxáak pa'j, aça' txãa pkala's kçxhãaçxha'jsa' nyafxíi leyku txã'wẽ yuu.

<sup>57</sup> Txã'wẽtewa, Dxus txakwe ewte kwe'sxtxi jxpe'jsa Jesukristo pu'çxpa'ga uuwa'ja's peena yu' ji'phuwa'jsameetha'w.

<sup>58</sup> Txãa pa'ga adx yakthê'jwe'sx, bagaçxte yuhwa pu'vxitumée Dxus yakh mfxi'zewe, Jesukristo's jwee íçxáa çxhãçxha selpiina, txãa pa'gatey Jesukristo's selpinisa' kxulsame'.

## 16

### *Yakthê'jwe'sxtxi pu'çxwa'j vxyu pkhakhni*

<sup>1</sup> Nyafxíi Galaciate ùsçxa', Dxus luuçxtxi kaapiya'th Dxus yakh fxi'zesatx pu'çxwa'j ma'wẽ vxyu's pkhakhwa'ja'swa aça' txã'sa' kxtey myũuwe.

<sup>2</sup> Ki'sen iisa teeçxsa na'wẽçxah i'kwe'sx ji'phuni's makwe úswa'ja'swa txuhdeçxa jxaawna me'jwe, adx pa'the pkhakhna úsya'mée.

<sup>3</sup> Kxte adx pa'jçxa' txãa pkhakhni vxyu'sa' Jerusalenna kaja'nja, aça' u'jwa'jsa pakweene'kwe txãawe'sxtxi karta úsu'nja, Jerusalente yakthê'jwe'sxtxi dukkhahn petx txãa vxyu yã'jçxa.

<sup>4</sup> Meeçxa' adx yuu wáa u'jwa'j kasejena aça' u'jwe'nja, nawa txãawe'sxwa adx yakh pi'kxna yuweetxna.



*Pablo u'jya' yaakxni*

<sup>5</sup> Adxa' yuhçxa', Macedonia kiwey uykhēwna yuwe'nja i'kwe'sx tasxte pa'jya'.

<sup>6</sup> Kxte pa'jçxa' maz en jxthēyuuwá'nja meeçxa' nus en skhēwpkaçx. Aça' i'kwe'sxa' pu'çxhine'kwe txâajũ adx ki' u'jwa'ja's.

<sup>7</sup> Dudteçxáa i'kwe'sx yakh puutx uyya' yuu wēje'çmeeth. Kxte txaçxthu ũs wēje' i'kwe'sx yakh, Dxus txã'wē wedxwaça'.

<sup>8</sup> Nawa ayte Efxesote nee ũsya'wath, Pentekostes fxiesta skhēwpkaçx.

<sup>9</sup> Txã'wē açesa ũstewa, Dxus j̄i mj̄iwa'j wala ew yuuça' naa pa'ga txã'sa' ivxiitume'nja s̄ju'th.

<sup>10</sup> Timoteo pa'jawáana aça' mpu'çxwe, k̄htewa nxusméé wēt i'kwe'sx yakh ũskahn. Txã'wēme', txãawa adx na'wēyçxáa Jesukristo's selpisá'.

<sup>11</sup> Txãa pa'ga kimwa açenuwe, wejxwa mpu'çxwe dxi'the peejxmée yuuwa'ja's, kxah adx tasxte ki' sxawedna pa'jya' ājana. Txã'wēme', adxa' Timoteo's ũythasna ũsthu ayte yakhthē'jwe'sx yakh.

<sup>12</sup> Apolosa's wala pxthaa we'weth yakhthē'jwe'sx yakh i'kwe'sxtxi puutx uyya' u'khan. Nawa āçxh̄i yu' duduuçme', sa' maa ente u'jwa'j kasehteçxáawa yuweena.

*Yuwe weçxaa kaahnitx pta'sxna fxi'jni*

<sup>13</sup> Jxpa'yakx çxhāçxha mfxi'zewe, Dxus yuuçxá's ũuste peçxkanamée yajkxna.

<sup>14</sup> K̄h yūuççxawa peeygāawa'ja's yuuçxáa yajkxna txã'wē myūuwe.

15 Yakhthē'jwe'sx, jiine'kwe Akaya kiwete nyafxçxah Kristo yuwe ewsa's jxpa'gasa' Estefx-anaswe'sxta', sa' txāawe'sxa' wala selpiitx Dxus tasxte utxasaawe'sxtxi pu'çxna.

16 Aça' i'kwe'sxa' peeygāawa'j ji'phi'kwe txāawe'sxtxi's meeçxā' maawa txāawe'sx na'wēy pu'çxna selpisaatx.

17 Adxa' wala weçxa'th, Estéfxanas, Fxortu-nato, Akáiko txāawe'sx ayte pa'pha'ga. I'kwe'sxa' ayte adx yakh ūsmeeçxa', adxa's pu'çxya' āja'çmeei'kwe.

18 Nawa txāawe'sxa' adxa's kçxhãaçxha'jtx Dxus yakh weçxana fxi'zewaja's, sa' i'kwe'sxtxiwa txā'wēy ne'ta yuu. Aça' nasa txāawe'sx na'wēysatxi' peeygāawa'ja'.

19 Dxus yakh fxi'zesawe'sxa' Asia kiwete yuwe weçxaa kaja'tx. Txā'wēy Akila ptamwa yuwe weçxaa kaja'tx, kxtee pkhaakhesawe'sx yā'jçxa.

20 Yakhthē'jwe'sx jxukaysa yuwe weçxaa kaahni's mpa'gawe, sa' teeçxsa na'wēçxah puutx mweeçxawe.

21 Pablo yaasesath adx kuseju fxi'ja' i'kwe'sxtxi weçxana.

22 Maai' yu' Jesukristo's açesa ūswáatxna, aç'a' txāawe'sxtxi' Dxus kastigote ivxiituwa'j yuutxna. Kwe'sxtxi jxpe'jsa Jesukristo dud kīhwaça' sūju'th.

23 Jesukristo' i'kwe'sxtxi bedekīina.

24 I'kwe'sx jxukaysatxthu adx peeygāani's kaja', Jesukristo's neewe'wena.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

06da09f4-8d0f-5001-ae8c-0e6aa0131ffd